

**EIGHTH LEGISLATIVE ASSEMBLY OF MIZORAM  
(SEVENTH SESSION)**

**LIST OF BUSINESS**

FOR SEVENTH SITTING ON THURSDAY, THE 4<sup>th</sup> MARCH, 2021  
(Time 10:30 A.M. to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**LAYING OF PAPERS**

2. **DR. K. BEICHHUA**, Minister to lay on the Table of the House a copy each of the following :
  - i) The Mizoram Drug Treatment cum Rehabilitation Centre Accreditation Rules, 2019.
  - ii) The Mizoram Drug Treatment cum Rehabilitation Centre Accreditation (Amendment) Rules, 2020.
3. **PU ROBERT ROMAWIA ROYTE**, Minister to lay on the Table of the House a copy each of the following :
  - i) The Mizoram (River Rafting) Rules, 2021.
  - ii) The Mizoram (Aero Sports) Rules, 2021.

**FINANCIAL BUSINESS**

4. **GENERAL DISCUSSION ON THE BUDGET FOR THE YEAR 2021-2022**  
General discussion on the budget for the year 2021-2022 (to commence).

H. LALRINAWMA  
Commissioner & Secretary

.....

**SPEAKER** : *Thil tha leh tha lo hi Chungnungbera ka atanga chhuak a ni lo vem ni?* *Tah hla 3:38*

Awle, Zawnha leh Chhannaah kan kal ang a, Starred Question No. 81, zawt turin Member zahawmtak Dr. Vanlaltanpuia ka sawm e.

**DR. VANLALTANPUIA** : Pu Speaker, ka lawm e. Ka zawnha starred question No. 81-na Land Revenue & Settlement changtu Minister zahawmtak chhan atan -

- a) Mizoram University Southern Campus hmun tur tihfel a awm tawh em?
- b) Tun dinhmun a kan thlen chin engnge?

**SPEAKER** : Chhang turin a changtu Minister zahawmtak, Pu Lalruatkima ka sawm e.

**PU LALRUATKIMA, MINISTER:** Pu Speaker, Member zahawmtak zawnha chhanna chu -

- a) Mizoram University Southern Campus hmun tur hi tun dinhmunah tihfel a la ni lo.
- b) He campus atan hian Mausep ram, Pukpui VC area, Lunglei District chu Higher & Technical Education Department leh Pukpui VC te'n an thlang a. Acquire tura hma lak zet a ni a, amaherawhchu, sawrkar ram ruak, mimal ram nei awm lohna nia hriat anih avangin acquire tura Notification Ni 26.06.2020-a chhuah tawh chu Ni 22.12.2020 khan revoked leh a ni a. Proper channel-a land lease dil tura Higher & Technical Education Department hmalakna nghah mek a ni.

**SPEAKER** : Zawhbelhna zawt turin a zawnha neitu Member zahawmtak Dr. Vanlaltanpuia ka sawm e.

**DR. VANLALTANPUIA** : Pu Speaker, ka lawm e. Ka zawnha belhna chu, University hi MHRD hian *in principle approval* min pekna hi a rei ve deuh hlek tawh a. Kan hriat danin HEFA, Higher & Technical Institution Finance Agency lam atang hian loan te pawh kan hmu thei dawn niin a lang a, chu chu tuna hmu thei tur chuan a ram leh a hmun hma tihfel vat vat hi a ni a, khawngaihtakin hei hi chhim lam mite hian a bik takin kan hmahmawh viau tawh mai a, kan Minister hian chak deuhin hma min laksak thei em tih a ni a.

Tin, a pahnihaah chuan, 1986 MNF sawrkar leh India sawrkarin Memorandum of Settlement an ziah zul zuiin Pukpui sipai hmun hlui vel hi re-settlement la tih theih loh in tunah hian a awm reng mai a, cadastral survey titute pawh kan mamawh hle mai a, hengte hi min ngaihtuah sak thei em tih kha ka zawt tel a ni e.

**SPEAKER** : Zawhbelhna zawt turin Member zahawm tak Pu Zodintluanga Ralte ka sawm e.

**PU ZODINTLUANGA RALTE:** Pu Speaker, ka lawm e. Land Revenue & Settlement Department hian Northern, Western leh Eastern Campus tan hmun a buapui tan tawh em tih ka zawt e.

**SPEAKER** : Zawhbelhna zawt turin Member zahawmtak Pu Lalrinsanga Ralte ka sawm e.

**PU LALRINSANGA RALTE:** Pu Speaker, ka lawm e. Land Revenue & Settlement changtu Minister zahawmtak chhan atan ka zawh belhna chu –

- i) Zokhawsang-a Assam Rifles ram zau zawng min hrilh thei em?
- ii) Land Lease siam a ni em? Siam ni se, engtik kumah nge siam anih?
- iii) Tin, Pu Speaker, tuna Assam Rifles Aizawl khawpui laili taka awm te hi Zokhawsang-a an insawn chhuahna turin eng chen nge hma lak anih tawh tih kha ka zawhna a ni bawk e.

**SPEAKER** : Southern Campus atangin Zokhawsang te a ni a, a theih anga chhang turin Minister zahawmtak Pu Lalruatkima ka sawm leh e.

**PU LALRUATKIMA, MINISTER:** Pu Speaker, ka lawm e. Zawhna neitu, Member zahawmtak Dr. Vanlaltanpuia zawhna kha, kan hriat angin Southern Campus University nei turin sawrkar chuan theih tawpin hma a la a, chutah chuan department-te pawhin hemi chungchangah hian joint meeting neiin a dahna tur hmun te kan ngaihtuah a. Kan ngaihtlak tak ang khan Preliminary Notification-te chhuahin mimal ram lo tla zep a awm em tih te uluk takin a enfiah a, chumi hnuah a awm lo nia hriat anih takah chuan Land lease pangngai anga process leh turin kan han ruahman a. Chuta tan chuan Pukpui, Mausep ram acquire turin kan han ti zet a, mahse land lease anga a kal leh theih dawn takah chuan Department Land Lease kha awlsam zawk tura kan ngaih a ni a. Chumi tur chuan survey fee tur kha ₹1,26,000/- turin Settlement Officer, Lunglei khan a rawn chhut a, sum mamawh hi tunah hian Director, Land Revenue Department chuan Higher & Technical Education Department-ah dilna siamin chung survey report leh demarcation sketch map te nen sawrkarah Land Lease siam turin theih tawpin hma lak a ni a. Kan hriat angin a zawhna neitu hian theih tawpin a bawhzui bawk a, hun rei lo teah ram hi kan inpe fel thei turah kan ngai a ni.

Tin, kum 1986-a Memorandum of Settlement angin Pukpui khawchhung ram thenkhat saw cadastral survey tih theih a ni em tih kha, kan hriat angin Pukpui, Lunglei-ah sawn Indian Airforce 42 Wireless Experimental Unit, Sub-Unit-C tan ram bigha 3, acre 3.612 rawtna 2013 daih tawh khan a lo awm a. Chumi piah lamah chuan vantlang ram eng emaw zat acquire tur area pawn lamah sawn a awm bawk a. Chungte chu teh fel turin

cadastral survey te pawh neih a tul khawp mai a, surveyor kan indaih lo deuh hlek a, Land Acquisition kan process avangin, hun remchang hmasaah kan lo enzui dawn nia.

Member zahawmtak Pu Zodintluanga Ralte-in, Northern, Eastern, Western tan ram buatsaih a ni tawh em a tih kha, University turah kan ngai ngawt mai a, a zawhna kha a kim lo deuh hlek a, keini hi Revenue Department kan ni daih si a, Higher & Technical Department-in ruahmanna a neih chuan a mamawhtu ten ram an rawn dil chuan sawrkarin ram awl remchangte ngaihtuahin ruahmanna a lo neihpui mai dawn a ni. Tun dinhmunah chuan khatiang kha a la awm rih lo a ni.

Member zahawmtak Pu Lalrinsanga Ralte-in Zokhawsang-a Assam Rifles awm dan saw Land Lease te pawh hi an lo nei tawh reng em tih a zawhna kha, Land Lease hi kum 2006 khan Zokhawsang Assam Rifles-te awmna tur saw pek a ni a, Land Lease No. 62 of 2006 a ni a, hectare 524 zeta zau ramah sawn Assam Rifles Lammual hmun atanga insawna tura ruahman a lo ni tawh a. Assam Rifles insawn chhuah chungchang hi Political issue deuh hi a. Pu Speaker, ka ngaihtuah a, *Chhura Chengkek lo tur* te pawh hi kan ang lek lekin ka hria a, tunhma atangin, ‘Na-a chu nise a lo mai tur’ tih ang deuhin. Kum 2002 khan, ‘The Mizoram Restriction on Use of Transfer Land Act, 2002’ hmangin saw lai ram saw, mimal leh vantlangin tangkai taka mimal tel lova thil ti thei ten an lo insem fo mai thin a, chung laka a him theihna turin a protection Dan chu an lo duang a, chutah chuan vantlang leh sawrkar tan tangkai taka hman tura tih a ni. Land lease kha 2006-ah Zokhawsang hmunah pek zui a ni ta baw a, *Chhura chengkek lo ang mai* khan, tumahin lo thei ta hek lo chu.

Assam Rifles chungchang hi Home Department chan mah nise February Ni 19, 2019 khan Zokhawsang lama insawn turin Ministry of Home Affairs-a an Under Secretary chuan lehkha rawn pein, ruahmanna lo siam rang turin a rawn ti a, kan State sawrkarin helaiah hian mawhphurhna pawh kan nei ve chu kawng tha taka lo siam leh tui leh eng supply pek kha a ni a, chungte chu kan tih tur ang sawrkar ang chuan kan ti zo vek a. Nikum, March Ni 11, 2020 khan Sukdesh K. Sahi, Joint Secretary, Ministry of Home Affairs tho hian May, 2020 ral hmam chhuahsan turin lehkha a rawn pe leh a, sawrkarin a tih tur zawng zawng a ti zo tawh a lawm a ti a, theihtawp chhuahin hma kan han la a. Covid hri a lo darh baw nen duh angin ruahmanna a kal chak thei lo a. Tin, an harsatna pakhat nia lang chu Pu Speaker, contractor NPCC te sawn an contract hnathawh saw duh angin an kal chak pui thei lo a, chuvang chuan Assam Rifles te pawh hi la muangchang deuh rih ni te pawhin a lang a, helai hi ka chan nilo mah sela. Hman atang khan, *Na-a chu ni se a lo mai tur* tih kha Na-a chu kan nghakchhuak chu a ni ta deuh ber a, hun reilote-ah hian an chhuah te pawh mimal tak chuan ka ring a ni tih kha kha ka chhan theih tawk ni mai se la. Ka lawm e.

**SPEAKER** : Starred Question No. 82, zawt turin Member zahawm tak Pu C. Lalsawivunga ka sawm e.

**PU C. LALSAWIVUNGA :** Pu Speaker, ka lawm e. Higher & Technical Education Minister zahawm tak chhan atana ka zawhnate chu –

- a) Higher & Technical Education Department hnuaiah Ph. D degree holder a ngheta rawih engzat nge awm a, a nghet lo engzat nge awm?
- b) Technical students te hi book grant leh stipend pek an ni em?
- c) Govt. College hrang hranga Library tichangtlung tur hian hmalakna engnge awm? tih a ni e.

**SPEAKER :** A chhang turin a changtu Minister zahawm tak, Dr. R. Lalthangliana ka sawm e.

**DR. R. LALTHANGLIANA, MINISTER:** Pu Speaker, Member zahawm tak Pu C. Lalsawivunga zawhna chhanna chu –

- a) Higher & Technical Education Department hnuaiah Ph. D Degree holder a ngheta rawih mi 154 (za sawmnga pali) an awm a, a nghet lo mi 77 (sawmsarih pasarih) an awm.
- b) August Ni 21, 2012 Cabinet Meeting agenda No. 13-naa thu tlukna an siam angin technical student-te tan book grant leh stipend hi kum 2012-2013 session atangin pek a ni tawh lo.
- c) Government College hrang hranga Library tichangtlung tur hian hmalak a ni –
  - i) Govt. T. Romana College Library tihchangtlunna tunah hian NEDP hnuaiah ₹320 lakh senga building sak mek a ni.
  - ii) RUSA Purchase of Material hnuaiah Govt. College zawng zawng tan Library tihchangtlunna atan sum pek vek a ni.
  - iii) Govt. College Library tihphuisuina tur leh infrastructure sakna tur atan ₹3.12 crore SEDP-ah dil a ni a, amaherawhchu sum harsatna avangin sum hmuh a la ni lo tih kha ka chhanna a ni e.

**SPEAKER :** Zawhbelhna zawt turin a zawhna neitu Member zahawm tak Pu C. Lalsawivunga ka sawm e.

**PU C. LALSAWIVUNGA :** Pu Speaker, ka lawm e. Technical zirlaite book grant leh stipend pek kha August Ni 21, 2012-2013 Academic session atang khan tih tawp a ni tih kha chhanna kan hmuh dan a ni a. Pu Speaker, hei hi zirlaite tan thil pawimawh a ni a, tun sorkar hian a pe leh thei ang em?

Pahnihna-ah chuan, Professional Institution, Mizoram Law College-ah Principal a nghet a dah a ni tawh em? Dah ngheh a la nilo a nih chuan engnge a chhan?

Pathumna-ah chuan, kum 2019-2020 Academic Session atanga class tan tur tih hi Mizoram Engineering College-ah class tan a ni ta em? Hei hi 2019 zawhna-ah khan tan tum

anih thu min hrilh tawh a. Class tan a nih chuan zirlai engzat nge awm? Class tan a la nih loh chuan, engvang nge tih kha ka zawhbelhna a ni e.

**SPEAKER** : Zawhbelhna zawt turin Pu B.D. Chakma kan sawm e.

**PU B.D. CH AKMA** : Pu Speaker, ka lawm e. Kamalanagar College hi a ding rei tawh a, a area pawh a zau tha a, tunah hian zirlai pawh an tam khawp mai a. Lecture Hall hi an indaih lo lutuk a, chuvang chuan ka zawhbelhna chu –

- i) Kamalanagar College atan Lecture Hall min sak sak thei ang em?
- ii) Mizoramah NAAC Accredited College neilo engzat nge awm?
- iii) Kamalanagar College hian NAAC Accreditation hi a la nei lo a, a neih lohna chhan hi engnge? Pu Speaker, ka lawm e.

**SPEAKER** : Zawhbelhna zawt turin Dr. K. Pachhunga ka sawm e.

**DR. K. PACHHUNGA** : Pu Speaker, ka lawm e. Ka zawh belhna chu – Mizorama College zirtirtu Associate leh Assistant Professor-te inter-state seniority list a nei em? Tin, Director an ni ve thei em tih ka zawt e.

**SPEAKER** : Awle, a theih ang ang chhang turin a changtu Minister zahawm tak Dr. R. Lalthangliana ka sawm e.

**DR. R. LALTHANGLIANA, MINISTER:** Pu Speaker, zawhna neitu zawhna kha ka chhan hmain a tawp ber atang khan ka han chhang dawn ang e.

Inter-state seniority list hi tunah hian hman tur kan la nei lo a, hei hi ngaihtuah pawh a tha mai thei a. Engpawh nisela, Dr. K. Pachhunga, MLA zahawm tak Lunglei South bialtu zawhna kha khati zawng khan ka chhang mai ang e.

Tin, Kamalanagar College chungchang Pu BD Chakma rawn zawhna kha a pawimawh khawp mai a, Lecturer Hall hi han tih mai dawn hian a buaithlak ve deuh a. Kan vanduinah pakhat chu, Kamalanagar College te, Lawngtlai College te, NAAC Accreditation tih chungchang te; Kolasib hi tunah a qualify dawn mek niin ka hria a, Johnson College hi a la qualified lo a, la hmachhawn tur a ni a. An qualified loh khan facility tam tak a keng a, an qualified erawh chuan Aizawl-ah pawh college bikah RUSA hnuaiah pawisa tam tham tak tak hi tunhma atang khan an dawng chho a, qualified phei se chuan tuna zawhna tih ngei ngei tur ngai kha chu a harsat ka ring lo khawp mai a. Eng pawh nisela, kawng danga tih dan la ngaihtuah deuh te pawh a that chu ka ring.

Tin, kan han hriat chinah chuan Government College-ah chuan tuna kan han sawi college pali kha an la qualified lohna kha a chhan niin ka hria a, a dang a awm awm ka hre

chiah lova, private college-te hi chu kawng dang nisela, a awm nual a ni private college zingah.

Zawhna neitu Member zahawm tak Pu C. Lalsawivunga zawhna kha a pawimawh khawp mai a. Stipend leh book grant tih tawp hi ka hun hma thil deuh hlek kha a ni a, nichina ka sawi ang khan sawrkar hmasa cabinet meeting, August Ni 21, 2012, Agenda No. 13-ah khan, 'Granting of scholarship, stipend, book grant to pre and post matric including technical, medical and professional student' tih kha a ni nghe nghe a, college chauh kha a ni chiah lo a ni. Khalaia tih tawp anih chhan hi kan hriat chian thain ka hria a, 'Granting of the following from the state plan fund may be discontinued (tih tawp tur) from 2012-2013' tia a chhan a ziah dan chuan, 'since they are being granted on the various centrally sponsored scheme from Ministry of Tribal Affairs' tih a ni a, tin, Ministry of Minority Affairs leh NEC atangtein tih kha an ziaak ta a, khatah khan thil tam tak a huam a, Chuvang chuan, sawrkarna kan han lak tak atangin kum 2 awrh emaw lek a ni a, ngaihtuahna pawh kan nei tho nachungin sum harsatna avangte pawh a ni ang a.

Tin, Sorkar hmasa cabinet-in uluk taka an lo tih tawh a ni bawk nen han tih leh mai dan hi avang ang reng khawp mai a. Tin, chutih mek lai chuan, chhonzawm mek thenkhatte pawh a awm ve tho bawk tih kha ka sawi duh a. Chung zingah chuan, kan hriat ve atan, 'incentive award to those who qualified in the examination conducted by Union Public Service Commission' tih te, tin, Mizoram Scholarship Fellowship, research fellowship bikte, post matric merit scholarship te, free re-imburement for children of war-widows (indona a lo tel tawh thin fate) tih kha a awm ta a. Scholarship/stipend han tih khan a category hrang hrang a awm a, engpawh nisela a nawlpui tuna harsatna lian tak kan han tawh theihna ang chi kum 2012-a tih tawp kha, thil awmdan ala inthlak chuang lo a ni.

A zawhna dang leh, Professional College kan tih, Government Law College-in Principal nghet a nei em tih hi, qualification hi an duhtui a, chuvangin a nghet tura thil han tih zung zung hi a harsa khawp mai a. Amaherawhchu nikum hmasa chho niin ka hria a, Government College tam tak permanent principal neih lohna kan nei ta hlauh mai a, kan lawm em em a. Heng kan lakna kawngah hian Pu Speaker, kan hriat zau pawh a tha a; national papers-ah zau takin India ram hmuntin atanga dil thei tura tih a ni a, chuvang chuan kan state pawn a mite anrawn qualified-a Mizoram chhungah qualified kan awm ve si loh khan, heng lo entertain hi a tha ber em tih te hi ngaihtuah a ngai khawp mai a. A chang chuan rilru hnualna deuh te pawh a awm ve thin a ni.

Engpawh nisela, Government College hmun thenkhatah regular/permanent Principal kan la nei lo a, neih leh thuai te pawh a thain ka hria a, hmalak kan la tum turah ka ngai.

Tin, Lunglei-a Engineering College chungchangah hian House-ah pawh zawhna Session hmasa lamah te pawh a awm thin a. Hemi chungchang hi a buaithlak khawp mai a, RUSA pawisain sawrkar hmasaah khan Pukpui, Lunglei atanga km 6, km 7 bawr velah sawn

sak a ni a, Boys hostel, Girls hostel, classroom, library leh cafeteria turte sain an zo mai a. Amaherawhchu approach road hi a awm lo tluk a ni a, a satu hian engtingge a sak theih aw ka ti a, keipawh tum 2 ka va kal tawh a, approach road saw a mumal lo hle mai a. Tin, approach road bakah power supply a lut lo hrim hrim a, kilometre tam pawh ngai a ni a, tui engmah a awm lo bawk a, a satu sak lai pawhin a buaithlak ngawtin ka ring, Pu Speaker. Tin, faculty lakna tur atan provision a awmlo leh a, chuang chuan thil tih ngai a tam khawp mai a. Kan sawrkar hlim khan theihtawp kan han chhuah ve tho a, amaherawhchu sum hi a tlem berah a function-na tur atan hian 11 crore (vbc sawm leh pakhat) vel hi a ngai a. Hon. Chief Minister pawhin nikum lam atang tawh khan tih ngei a ngai a ti a, amaherawhchu Covid-in min tlakbuak a, sum harsatna avangin tun thlengin kan kalpui thei ta lova, chuang chuan class kan tan thei ta lova.

Ka han sawizau lawk duh chu, tunah pawh hian Mizoram Southern Campus, MZU hnuaiah kan neih chhoh theihna tur atan nikum hmasa, kum tawp lampang 2019 December thlaah phalna min rawn pe thlap tawh a, Ministry of Human Resource Development atangin. Nichina zawhna pawh khatiang hmunhma chungchang kha a ni a. A hmunhma chu a fel mai turah ka ngai a, a bialtu Dr. Vanlaltanpuia hmalakna te pawh a ni ang a, theih tawpin kan Revenue Minister pawhin min tuipui a.

Tin, thil buaithlak chu, Engineering College din dawn khan khang zawng zawng kha ngaihtuah a ngai a, hon. Chief Minister pawhina min pawmpui tak pakhat chu, approach road, tui, electricity leh faculty quarter turte kha a awm lo hrim hrim a ni. Tin, a enkawltu tur quarter pawh a awm miah lova, khang zawng zawngte nen khan rinaiin a senso a tam dawn a ni. Rilrua a awm danah chuan, khang ruahmanna pawisa kha awm thuai thei se chuan han din ta ila, MZU Campus nen khan kan clubbed khawm thei turah ka ngai a. Engineering class a awm ang a, MZU Southern Campus tan thuai theihna tur atana infrastructure a lian bik kha chu kan loh neih tawh sa hmang tangkaiin tih kha ngaihtuahnaah a awm a. Kha nen khan a inzawm vek avang khan Pu Speaker, zawhna neitu khan thil awm tak a rawn zawtin a, kan hriatzau atan pawh hei hi tul a, mahse a tih lawk theih loh avang a ni tih kha House Member zahawm tak tak ten kan hriat kha a tha in ka hria a ni.

**PU VANLALHLANA** : Pu Speaker, RUSA chungchang a sawi lai tak khan ka lo inzep ve lawk ang e.

Higher Education atan hian GSDP atangin 2% vel dah tur tih hi RUSA Dan ah hian a awmin ka hria a, chu chu tun budget-ah hian dah a ni em tih kha Minister zahawm tak kha ka zawhbelh duh a. Tin, student/teacher ratio hi RUSA dan ah hian 20:1 niin ka hria a, chu chu Mizoram ah hian kan zawm thei em tih te. Tin, kar hmasa a zawhna starred Question-ah khan teaching post, higher secondary zirtirtu-ah hian 92 kha hnawhkhah loh, ruak a awm ni khan chhan a ni a, a tam hle mai a kha kha chu, zirlaite tan pawitham a ni tlat mai a, hnawhkhah theih dan a awm em, kan Minister hian khati zawng khan hma a la thei em tih ka zawt bawk a ni.



**DR. R. LALTHANGLIANA, MINISTER:** Awle, budget kaihhnawih lai 2% chungchang kha chu chipchiar takin ka la bih hman chiah lo va. Karleh maiah kan enchiang thei turah ngai ta ila, chuti mai chuan ka sawi thei chiah lova.

Tin, pahnihnaa a rawn sawi, faculty post chungchang hi zawhna chhannaah pawh a awm a, total sanction post kan neih hrim hrim hi Mizoram Govt. College atan hian 876 a ni a, regular incumbent kan neih hi 637 a ni a, tichuan, contract basis a kan lak hi 147 a ni a. Tin, Chief Minister hovin sum harsa tak karah casual teacher, 25,000 hlawhin (hming phuahchawp deuhin) mi 100 nikum lam khan kan la a, chu pawh chu college authority ten uluk takin anmahni area chhung deuh bikah awm tha duh tur tih ngaihtuah telin kan ruai a ni. Tin, part time hrim hrina hi 47 tunah hian an la awm a, he part time zingah hian 11 te hi qualified an ni a, an hlawn awmdan hi mumal taka set a harsa khawp mai a, kan fixed dan kha ka chiang chiah tawh lova, a then chu part time han tih hian ₹800/- per lecture emaw, khatiangte khan kan ti a, college thenkhat hian part time tak tak an tih avang hian official ang maia han tih hi a rem lohna chin a awm a. Engpawhnise, qualified nilo rei tak tak lo thawk tawh si kha part time-ah hian 36 an la awm a ni; kha kha thil awmdan a nia.

Tin, nichina post ruak chungchang zawhna kha, 92 hi clear vacancy kan neih a ni a, tun dinhmunah hi chuan a harsa deuhin ka ring a, engpawhnise, kan ti naw naw theiin ka ring a. Tin, ratio kha a nih dan tur dik tak zirtirtu pakhatin zirlai naupang hisapa school education-ah te pawh kan neih ang chi te pawh kha chian a harsa deuh a. Tunah hian admission kan ti tan deuh chauh a, a figure uptodate tak hriat a har deuh hlek a, Covid hnuah admission kan han tih leh hnuah hian update ratio kha alo chhuah mai ka ring a, kan inhriattir dawn nia. Kha kha Pu Speaker, ka chhan theih chin chu nise. Ka lawm e.

**SPEAKER** : Starred Question No. 83, zawt turin Member zahawm tak Pu Lawmawma Tochwawng ka sawm e.

**PU LAWMAWMA TOCHHAWNG:** Pu Speaker, ka lawm e. Minister zahawm tak Public Health Engineering Department changtu chhan atan-

- a) Mipuiten tui thianghlim hnianghnar zawk kan neih theihna tura sawrkar hmalakna lian zual engte nge ?
- b) Lunglei District chhunga Department hmalakna awm engte nge?

**SPEAKER** : Chhang turin a changtu, Deputy Chief Minister zahawm tak Pu Tawnluia ka sawm e.

**PU TAWNLUIA, DEPUTY CHIEF MINISTER :** Pu Speaker, Member zahawm tak zawhna chhanna chu –

- a) Tui thianghlim hnianghnar zawk kan neih theihna tura sawrkar hmalakna lian ber chu thingtlang in tinah tui connection JJM Scheme hnuah pek vek tura hmalak

mekna hi a ni a. Pumping Scheme hrang hrangte hi central funding source hrang hrang kan hmuhte hmanga hmalak ani bawk a. Chung kan tui mipuite hnena kan pekchhuah te chu a thianghlim ngei a ni tih hriatna turin laboratory tui thianghlim leh thianghlim lo enfiahna khawl hi district tinah dahin hman theih veka buatsaih a ni.

b) Lunglei District a PHE Department hmalakna te chu:-

- 1) Rural area In tina tui connection pek. Hei hi JJM Scheme kan tih kha a ni.
- 2) Tunah hian drainage leh sewerage system Lunglei khawpui tana siamna turin scheme NLCPR ah thehluh ani a.
- 3) Lunglei khawpui tui tlan tuna mi saw a tlem tham tawh avangin leh alo hlui tawh avangin, Augmentation and Renovation of Greater Lunglei Water Supply Scheme hi NLCPR-ah thehluh a ni bawk a. Tin, tunah hian Mualthuam 'N' leh Ralvawng-ah te water supply scheme (solar pumping) hi thawh mek a ni.

**SPEAKER** : Zawh belhna zawt turin a zawhna neitu Pu Lawmawma Tochwawng ka sawm e.

**PU LAWMAWMA TOCHHAWNG:** Pu Speaker ka lawm e. Zawhbelhna ka zawh hmian ka zawh belh chhan tawitea han sawi lawk a ngai a, min lo hriatthiam ka duh a. Lunglei khawpui bika tui lama kan harsatna kan sawrkarin min lo hriatsak turin -

Lunglei khawpui bikin tuna kan rin rawl Pialthleng tui pump saw kum 29 vel kal ta ami a ni a, 1995 ah khan hman theih tura hawn a ni. Chhungkaw 11,000, mihring 66,000 vel chawm tura duan a ni a. Tunah hian chhungkaw 20,000 vel zet mihring 1,00,000 vel kan lo awm ta a, kan khamkhawp ta lo hle a ni. Tui mamawhna a pung a, tuihna a tlem zel si. Tin, tui pekna pipe te saw a hlui lutukin a tuiek nasa tawh a, a leak in a puak fo ta mai a. Tin, a tuiek nasat avangin a tui pekchhuah pawh saw a thianghlim tawh tawh lovang tih a rin theih a. Tui pump khawl pui awmna Pialthleng kawng saw a chhe em em mai bawk a.

A danglehah chuan department lama kan hnathawktute an inpeka an taimak tehluh nen an chenna quarter te saw a hluiin a tawp tawh lutuk tawh a an khawngaihthlak mai nilovin an zahawm tawh zawk a ni. Lunglei khawpui tui harsatna zualpui min sutkian sak tur leh Greater Lunglei Water Supply Scheme atana Mat Lui khuah augmentation nichina kan han ngaihthlak takte kha a hma lamin sorkar hian min ngaihtuah fel sak thei angem tihte, kangmei chhuah palha hman tur public hydrone centre saw hmun hnih hmun thumah chauh a awm a, a khawpui tan a him ta lo hle mai a, siam belh saw tihmakmawh a ni a, khawngaihtakin kan sorkar hian a ranglamin min ngaihtuah sak thei ang em tih a ni e.

**SPEAKER** : Zawhbelhnaa phar in tam khawp mai, mahse hemi dawtleh atang hian a dawt leh dawt leh, dawt leh a awm a nia. Hman vek turah ngai ang aw. A phar hmasa ber Dr. Vanlalhlana ka sawm e.

**DR. VANLALTHLANA** : Pu Speaker ka lawm e. PHE changtu Minister zahawm tak chhan atan -

Pakhatna chu, kawr thenfaina atan hian sum dah hran thin a ni em? Hei, kan kawr te a bal thin khawp mai a, thal te a ni a thenfai a ngai thin a, heng hmalakna tur atan hian sum dah thin a ni em?

A pahnihna atan, Session hmasaah pawh ka sawi tawh a. Kawr hi RCC-in a chhuat leh a sir hi ti ila, tichuan khuh ta ila, a tlangchhip atangin ti thla ila. Tichuan, a phase-wise ang pawhin ti ila a tha lo maw tih rawtna te pawh ka siam a, 'kan lo ngaihtuah ange' tih a ni a. Khatiang ang khan hmalak tumna a awm em?

Pathumnaah, Ka bial Ramhlun North-ah sawn tanky a awm a, department pawh ka dawr thin a, a te a tui a dawng tam thei lova, tui sem hi a chatlak nasa thin a. Veng dangin kartin deuhthaw an dawn thin lain keini chuan ni sawm hnuah te, a chang phei chuan ni sawmpali hnuah te dawn chang kan nei thin a. Hei hi han siamthat deuh emaw hmundanga tanky han dah belh emaw hi tih tumna a awm em tih kha ka zawhna a ni a.

Tin, Ramhlun Veng chhakah sawn SIPMIU-in hmun a nei a, Hrangchhuana High School-ah te emaw modify-a tih theih te kha a ni a. Tin, Ramthar Veng Sihpui saw hman atanga che, sawlai hmuna cheng mipuite pawh buai thin an ni a. Tui connection pawh tih hleitheih a ni lo a. A chuan hnuai Galili Welfare ho sawn an mahni sumin tanky an insiam a, flexible pipe-in an in pe kual thin a. Sawlai saw siam sak turin MLA Fund pawhin ka ti a, amaherawhchu tunah hian kan MLA Fund 15 lakh lai laksak kan nih takah chuan thil a harsa chho ta viau mai a, tanky tui a put nasa tawh a, sak that a ngai si a, chhungkua 50 chuangan an ring a, sawlai saw min enpui theih dan a awm ang em?

**SPEAKER** : Zawhbelhna zawt turin Dr. F. Lalnunmawia, Aizawl South bialtu ka sawm e.

**DR. F. LALNUNMAWIA** : Pu Speaker, ka lawm e. Ka zawhna hi Pu Speaker a hnungah a awm thin a, tum thum tum li lai ka zawt hman tawh lo a, vawiin pawh hi a hnung leh lutuk a, ka zawh leh hman loh ka rin vangin ka rawn chuh ve a ni a min lo hriatthiam ka dil a.

Ka zawh belhna chu Pu Speaker, Aizawl Chhim kawtchhuah lam Hlimen, Samtlang Vengthar leh Lamchhip-ah te sawn tui a harsa khawp mai a. Sawng ah sawn tui dahkhawlina tanky siam tumna a awm em tih leh, Saikhamakawn saw tui an harsa em em a, tanky siam tel dan a awm ang em tih kha kan zawhbelh ve a ni e. Ka lawm e.

**SPEAKER** : A theih ang anga chhang turin Dy. Chief Minister zahawmtak PHE changtu kan sawm e.

**PU TAWNLUIA, DEPUTY CHIEF MINISTER :** Pu Speaker, a hnukung ber Aizawl South-III bialtu zahawm tak zawhna kha kan chhang hmasa mai ang a. A chhanna ah chuan, heng tanky siamna tur proposal ruahmanna siam vek a ni a, amaherawhchu sum harsatna vangin kan la thawk hlei thei lo a ni.

Tin, Lamchhip khuah hi chuan tanky hi tunah chuan an nei tha tawk viau mai a. Tunah hian dah belh a ngai em aw kan ti a, kan lo enfiah ang nge. Lamchhip-ah hian tanky lian pahnih litres nuai 6 dawng ve ve a awm a, nuai 3 dawng a awm bawk a. Chuvang chuan dah belh ngaiin a lang lova. Saikhamakawn-a tanky tihlen leh tihphuisui chungchang chu nakinah ka sawi zawm ang a. Aizawl khawpui pumpui Water Distribution System tun ami hi a hlui tawh a, tin, kan sem chhuahna pipe hi a tet avangin a lian zawka thlak a ngai a, daih zai zawka tui kan sem theihna tur hian scheme lianpui siamin funding source kan zawng mek a, chungte chuan a huam vek dawn a ni tih kha ka chhanna ni sela, Pu Speaker.

Tin, North-II bialtu zahawmtakin a rawn zawhna, kawr thenfai leh a khuhna te kha tunah hi chuan scheme a awm chiah rih lo a. Aizawl khawpui pumpui bakah kan khawpui hrang hrangah te hian stones drainage kan ti a, kawr lianpui pui drainage siamthat a, a remchanna laiah mipuiin kan chhawr theih tura a chung a step siam hi chu scheme lianpui a awm a. Chu chu Aizawl chauh ni loin hmun dang ami te nen scheme pakhat dahin fund kan zawng mek a ni tih kha ka chhanna ni a. Ramthar-a tanky siambelh pawh kha distribution line kan siam belh ang zelin a rawn keng tel dawn a ni tih kha ka chhanna nise.

Pu Speaker, zawttu zahawmtakin a rawn zawhbelhna Pialthleng kawng siamthat a ngaih thu leh quarter siamthat a ngaih thu hi kan hre khawp mai a. A kalkawng saw nitina thawkte kalna a ni a, a saimthatna tur sum kan la nei remchang rihlo a ni e. Hengte hi thawhtur kan ngaihpawimawh zingah an tel a ni.

Tin, Lunglei khawpuiah Hydrants, tun a mi hi a tlem deuh a siam belh nise tih pawh kha, tuna ka sawi tur Greater Lunglei Water Supply Scheme augmentation-ah hian a tel vek dawn a ni. Pu Speaker, Lunglei East bialtu zahawm takin, Greater Lunglei Water Supply Scheme hnuai Mat tui pump chhoha a tlang sang atanga Lunglei khawpuia gravitation-a lo luang thla tur a sawi kha nichina ka sawiah khan a tel tawh a. Augmentation and Renovation of Greater Lunglei Water Supply Scheme hi NLCPR-ah thunluh a ni a, priority hmasa pawl takah pawh kan dah a, hei hi chu department hotute nena kan sawihonaah pawh, hei hi chu priority kan pek a ngai ang, kan khawpui ber dawttu a ni a kan ti a, kan list-ah pawh a hmasa lamah a awm e tih kha ka sawi duh a ni a.

Tichuan, vawiiin ni ah hian Pu Speaker, ka sawi duh chu, zawhna pakhatna ah khan PHE department atanga mipuite tui intur thianghlim pekna tur scheme lian tih ah khan thingtlang khua zawng zawng a cover vek a, JJM Scheme hi kum 2019 atang khan hman tan tawh a ni a. Hei hi tunah hian thawh mawlh mawlh a ni a, a tah tawl te tein kan kalpui a ni. Kan zavai hriat atana ka sawi duh chu, kan bial theuhah khan thingtlangah tih hmasak

atana ngaihpaawimawh kan neih chuan inhriattir ni sela. Tin, department chuan scheme angin kum 2024-a zawh tur angin programme kan siam a, mahse kan performance a that avangin central lamin, ‘nangni chu 2023 ah zo rawh u, chumi target chuan scheme siam rawh u,’ a ti a, kan siam a kan lawm khawp mai a. Tunah hian kan performance pawh, Pu Speaker a tha khawp mai a, chuvang chuan central pawhin tunah hian 3<sup>rd</sup> installment (last installment) a rawn release tawh a. Chief Minister zahawmtak hnenah a pawisa hi hman tura min pek theih chuan central-in crore 35 incentive min rawn pek an tum a tiin kan thlen a, an niin min ngaihpaawimawh sak a, hmanni khan a pawisa hman phalna min pe tawh a. Chuvangin, March thla ral hma hian JJM Scheme atang hian crore 35 hi incentive atan min rawn pek, ziaak ngei a an tarlan a nih avangin min pek ngei kan ring a ni. Tichuan, Mizoramah hian khua 692, PHE chuan habitation kan ti a, village-a VC nei chiah lo pawh mihring awm tawhna zawng zawng nen khan 692 an awm a. Chutah chuan In 1,26,827 a awm a. Kum 2019 - 2020 ah khan In 15,941 hnenah functioning House Tap Connection kan pe tawh a ni. Tichuan, tun kum kal lai mek 2020-21 ah hian In 31963 hi kan thawk mek a, tun financial year chhunga thawh zawh hman ngei pawh kan tum a ni. Chumi belhchhah nan chuan, nichina ka sawi ang khan crore 35 vel kha incentive kan beisei a ni a. Thingtlang water supply-ah hi chuan a tahtawla thawk kan ni tih kha min hriatpui ula kan duh khawp mai.

Tin, kan Chief Minister hian a hriatchiangin a ngaihpaawimawh em em a, JJM atanga pawisa lokal tawh hi tunah hian crore 147 zet zawt a ni a. Chumi matching share pawh chu Chief Minister hian rang takin min rawn pe thin a kan lawm khawp a. Mipuiin tui thianghlim an in theihna tura hmalakna hi kan Chief Minister hian a ngaihpaawimawh avang hian JJM scheme hi kan thawk chak a ni tih ka sawi duh a ni.

Tichuan, wawiinah hian thingtlang khua nilo, khawpui lian deuh deuhah te hian pumping scheme kan ti a, chung chu funding source hrang hrang atang hian kan thawk mawlh mawlh bawh a ni.

**PU K.T. ROKHAW** : Pu Speaker, khawngaihin kan Minister khan a chhan nghal atan –

Tunlai Burma buaina chungchangah hian, Burma-ah kan unaute tam tak an awm a, loh theih lohin hun lo la kal turah raltlan tam tak kan la nei thei dawn a. Chuvang chuan, a bik takin border area-a awm Siaha District, Lawngtlai District, Champhai District tea khaw tam tak hian tui an harsa hlawm khawp a. Kan sawi tawh angin, raltlan tam tak kan la neih theih dawn avangin a bik takin border lam hi tui lak chungchangah hian duhsak bik ni sela, JJM hmalakna hmasaah khawngaihin min dahsak sela a lawmawm ngawt ang.

**PU TAWNLUIA, DEPUTY CHIEF MINISTER :** Pu Speaker, a bikin Urban Water Supply Scheme, Siaha tan tunah hian kan Chief Minister bawh hian central scheme atangin nuai 800 min pe a, tunah hian contractor te siamin kan thawk mek a ni. District headquarter a water supply scheme hi Department a kan committee pawh hian priority pek

a ngai ang kan ti a. Nichinah Lunglei kan sawi tawh a, Champhai pawh khi Tiau Lui khi dawt kan tum a ni. Chutiang chuan lianpui maiin scheme kan siam a. Mamit pawh hmannah kan sawi tawh a, Kolasib pawh tihchangtlun kan tum a, Saitual hi chu a intodelh thawkhat viau tawh a. Chawngte pawh kha hmannah solar pumping kan ti dawn kan tih tawh kha.

**SPEAKER** : Awle, Kan phal zau a, a maherawhchu, pakhata kan lak rei lutuk chuan a dangin min nghak si a. Tunah starred Question No. 84, zawt turin Dr. Vanlalhlana ka sawm e.

**DR. VANLALHLANA** : Pu Speaker, ka lawm e. Food, Civil Supplies & Consumer Affairs Department Minister zahawm takin a chhan atan -

- a) Aizawl nilo District dangah kumin hian LPG Home Delivery tih tum a ni em?
- b) LPG lakna Consumer Card photo copy, gas agency ten an dil thin hi phal a ni em?
- c) Sawrkar danah chhungkua (household) pakhatin LPG connection pakhat aia tam a nei thei em?
- d) LPG connection thar tihna (single leh double connection) atan sum engzat nge sen ngai?
- e) LPG connection thar siamin gas stove lei tel kher a ngai em?
- f) Mizoram State Consumers' Welfare Fund-ah sum engzat nge awm mek?

**SPEAKER** : Chhang turin a changtu Minister zahawm tak Pu K. Lalrinliana kan sawm e.

**PU K. LALRINLIANA, MINISTER:** Pu Speaker, ka lawm e. Zawhna zawttu Dr. Vanlalhlana zawhna chhana chu: -

- a) Tum e, District capital tinah kalpui tum a ni a. Tunah hian Kolasib town huam chhungah pawh kalpui tum a ni a, Mizofed kaihhruaina hnuaiah Joint VC leh Consumers' Union ten tihdan tur ngaihtuah mek a ni.
- b) LPG lakna Consumers' card photo copy Gas Agency ten an dil thin hi phal a ni em tih hi, phal a nih leh nih loh tarlanna engmah a awm lo a ni.
- c) Sorkar danah chhungkua (household) pakhatin LPG connection pakhat aia tam a nei thei em tih hi, dan pangngaiyah chuan a theih lohva, a theih dan kawng erawh chu a awm a. Marketing discipline quideline 2018 chapter 2.1.4-in a tarlanah chuan, chhungkua pakhata LPG connection pakhat aia tam a awm chuan, *ineligible connection* niin a tarlang a ni. Amaherawhchu, LPG Regulation of Supply & Distribution, 2000 chapter 3, clause 1(a)-ah chuan, Public Distribution System hnuai atanga hmun harsa leh supply dawng chhe zual chu central sawrkar emaw Oil Company hotute remtihhain connection pakhat aia tam pek phal thung a ni thin a ni.
- d) LPG connection thar tinah (single leh double connection) atan sum engzat nge sen ngai tih zawhna kha, tun dinhmunah hei hi Ni 15.2.2021 hma lamah chuan new connection, single connection-ah ₹4,775/- leh double connection-ah ₹6,850/- a ngai

a ni. Hei hi LPG filled cylinder rate danglam dan a zirin a danglam zel thei bawk a ni.

- e) LPG connection thar siamin gas stove lei tel kher a ngai em tih kha, hei hi a ngai kher lo a, consumer-in a lei tel duh leh duh loh a ni.
- f) Mizoram State Welfare Fund-ah sum engzat nge awm mek tih kha, Mizoram State Welfare Fund-ah hian vaibelchhe 2,04,16,906 a awm mek a, he sum hi Consumers' Welfare Fund (Corpus) sum a ni.

**SPEAKER** : Zawhbelhna zawt turin zawhna neitu Dr Vanlalhlana ka sawm e.

**DR. VANLALHLANA** : Pu Speaker, ka lawm e. Gas chungchang hi Session apiangin ka dinpui dawn ka ti a, ka la dinpui ziah a, ka vei a. Tin, helaiiah mipui aiawh kan ni a, Mizoram mipui a tam zawk chu kan ti thei ang a, chung aiawha ding chu kan niin ka hria a. Tin, consumer, organisation, association-ah hruaitu ka lo nih ve avang te pawh a ni ang a.

Gas Agency-te hian mipuite hi duh duhin min tikual a ni tih hi ka sawi duh a. LPG lei dawnin kei ngei pawh ka kal tawh a, double connection ka tih tir a, Rs 8,000 chuang min chawitir a, cash memo min pe rawh u, ka tihin min pe thei bawk si lova, mi ta va leisak ka nih avangin complaint thehluot lo mai ang an ti tlat bawk si a. Mi tamtakin an tuar a, miharsa zawkin an tuar a ni. Tin, Gas connection thar tihin gas stove an lei luh tir a, gas stove ni mai lovin, a tihfaina zawng zawng lei a ngai an ti a; tlema harh vang deuh tura an ngaihte chu an lo ti ngam lote pawh a ni mai thei. A harsa zual, a berh deuh hlekte phe chu an lo lei tir thin tihte chu kan hre vekin ka hria a. Department hian notification khauh tak hmangin hei hi a titawp thei em tih hi ka zawhna a ni a. Mipuite harsatna su kiang tur kan nih angin sawrkar hi a chet chhuah a hun tawh tih hi ka sawi duh a ni.

**SPEAKER** : Ngawi lawk rawh aw, Zawhna leh Chhanna hun a tawp a, i laklawh viau em? Kan phalsak mai dawn em ni? Awle, han zawt rawh le, kual thui vak lo ila.

Tin, pahnhnaah, LPG online booking hi tunah hian a tih theih tawh em tih a ni a. Pali ka nei a, pakhat hi chu ralhlante tih kha a ni a, an rawn sawi tawh tho a, provision siam ani em tih kha a ni a, ka zawt lo mai ang a.

A pathumnaah chuan, tunhnaiah pawh buaina a rawn chhuak a, K. Oil chungchangah te, kan truck hote chungchangah rawtna ka siam tawh tho a. Kan truck petrol phur emaw, diesel phur emaw, buhfai phur emaw, gas phur emaw-ah hian camera leh GPS khawl a dah theih a, a bawm a siam theih a. ICT Department kan nei a, DST kan nei bawk a. Hengho te nena tang kawpa tih hian bungraw phurtute motor-a dahin an thlen chin a hriat theih a, GPS-a sim card dah phe chuan an thlen chin leh khawiah nge an awm tih hi office

atangin a hmuh nghal thei a ni. Chutiang system chu neih dan a awm em, hma a lak theihloh maw, tih kha ka zawh belh a ni e. Ka lawm e.

**SPEAKER** : A changtu Minister zahawmtak, Pu K. Lalrinliana ka sawm e.

**PU K. LALRINLIANA, MINISTER:** Pu Speaker, ka lawm e. Zawhna neitu zawh belhna, notification khauh takin gas man, double connection leh thil dang dangah chhuah theih a ni em tih kha, a tul khawp mai a. Mi harsa zawk leh hnuaihnhung zawkte pawhin hemi chungchangah hian harsatna an tawh thin a. Chuvang chuan dan angin notification khauhtak chhuah kan lo tum ang e.

Tin, online booking a tih theih tawh em tih kha, home delivery tihna bikah hi chuan online booking kan kalpui mek a. A dangah hi chuan point delivery ala nih avangin online booking hi kan la kalpui thei vek rih lo a ni.

Tin, GPS emaw, camera emaw bungraw phur ho, a bik takin truck, oil, buhfai leh gas phurahte a dah theih em tih kha, oil company-te pawh hian tunah hian an dah tan mek tawh a ni a, chuvang chuan GPS dah theih hi chu a pawimawh khawp mai a. Nichinah zawhna neitu-in a sawi a, K. Oil phur pakhatat buaina kan nei a, Serchhip-ah, an lo hralh niawmin kan hria a. Kan han chhui a, Consumers' Union-te pawhin hei hi a fel lo a ni an ti a, FIR theh luh te pawh a ni hial a. Chutah chuan, driver khan DCSO-in hralh min phalsak a lawm a ti a. Enquiry kan han la a, a DCSO-in, 'ka ti reng reng lo' a ti bawh si a; 'i tih loh chuan FIR theh lut rawh' kan ti hial nghe nghe a. Chutiang dinhmunahte pawh chuan kan ding a ni.

Tuna zawhna neitu Pu Vanlalhlana sawi ang khan mipuite hmakhua pawimawh tak mai a ni a, he thilah hian chak taka hmalak pawh hi a tul a ni. GPS leh camera vuah lote pawhin an vuah theihna tura ngaihtuahna hman hi chu thil tul tak a ni. Ka lawm e.

**SPEAKER** : Aw le, tunah chuan, Laying of Papers-ah kan kal ang a. Dr. K. Beichhua, Minister zahawmtakin heng, 'The Mizoram Drug Treatment-cum-Rehabilitation Centre Accreditation Rules, 2019' leh 'The Mizoram Drug Treatment cum Rehabilitation Centre Accreditation (Amendment) Rules, 2020' te hi House dawhklanah rawn lay se, i lo sawm ang.

**DR. K. BEICHHUA, MINISTER:** Pu Speaker, i phalna leh House remtihhain ka paper pahnih, 'The Mizoram Drug Treatment cum Rehabilitation Centre Accreditation Rules, 2019' leh 'The Mizoram Drug Treatment cum Rehabilitation Centre Accreditation (Amendment) Rules, 2020' chu House dawhkanah ka rawn lay e.



**SPEAKER** : A copy kha rawn sem ula. In chang kim em? In chang kim chuan, tunah Pu Robert Romawia Royte, Minister zahawmtakin heng, ‘The Mizoram (River Rafting) Rules, 2021’ leh ‘The Mizoram (Aero-Sports) Rules, 2021’ te hi House dawhkanah rawn lay se, ka sawm e.

**PU ROBERT ROMAWIA ROYTE, MINISTER:** Pu Speaker, House zahawm tak leh i remtihain, ‘The Mizoram (River Rafting) Rules, 2021’ leh ‘The Mizoram (Aero Sports) Rules, 2021’ chu he House dawhkanah hian ka pharh e.

**SPEAKER** : A copy kha rawn sem leh ula. Kan changkim maw, financial business-ah kan kal tawh ang a, General discussion kan han tih kha wawiih hian kan tan dawn a ni. Kan hriat angin kan Chief Minister zahawm tak finance changtu ni bawh Pu Zoramthanga’n ni 1.3.2021 thawhtan ni khan budget a pharh a, chu chu kan sawi ho dawn a ni. Ni hnih sawi tur a ni a, wawiih hian kan tan ang a. Tichuan ‘The Annual Budget for the Year 2021-2022 with allied papers’ kan sawiho dawn a ni. Member-te minute engzat nge kan inpek leh ang le, minute sawm rawtna a awm a, kan ti mai dawn em ni? Awle, minute sawm kan in pe anga minute kua-ah warning bell a ri anga, opposition group leader-te kha minute nga-in kan inpe tam thin a nih kha. Tunge bul han tan ang le? Inzirna hun kan pe tam te taw viau che u a ni.

Opposition lam pawh kha in tang at turah ka ngai deuh a. Han ding teh ule. Group Leader te hi a changin an sawi hmasa a, a changin an sawi hnuhnung a, a thianga vek a nia.

Hei hun a kal zel a nia. Nge ni, wawiih atan chuan kan bang mai dawn? Thawhtan lamah kan chhonzawm mai dawn em ni ang? Awle, Member zahawm tak Pu C. Lalsawivunga i lo sawm ang.

**PU C. LALSAWIVUNGA** : Pu Speaker, in checkup turin ka kal ang ka ti a, mahse an ding lawk si lova, ka han ding mai ang a.

Pu Speaker, kum 2021-2022 Budget General Discussion wawiih kan nei ho leh thei a, a lawmawm hle a. Kei pawh wawi thum ka han tel ve thei chu a ni a, a lawmawm hle in ka hria a lawmthu ka sawi a. Hetih lai hian thahnemngai taka kan ram rorelna hmun a rorel ve thin kan hotupa Pu Lalduhoma tel lovin budget kan han sawi ho dawn a ni a, a khawharthlak hle in ka hria a. A thahnemngaihna te a fakawm a, a ngaihawm tak zet a ni tih kha Pu Speaker, wawiih hian ka sawi duh a. He House-ah hian lo let leh thuai turah beisei ila, duhsakna pawh ka hlan a ni.

Kum 2021-2022 Budget Estimate hi cheng vaibelchhe 10,366.32 a ni a. Tin, Revenue Expenditure hi cheng vaibelchhe 9,216.39 a ni a. Chu chu BE atanga chhutin 82.67% a ni. Tichuan, Revenue Expenditure hian sawrkar hnathawk hlawh te, pension hlawh te, leiba rulhna te leh thil chi hrang hranga sum hman tur a huam a ni. Chutah chuan

Budget Estimate pum pui, crores 10,366.32 atanga hman tur hi 82.67% daih a tling a ni. Tichuan, sum hmuh atanga loh theihloha sum hmanna a pun rual hian central atanga pawisa hmuh a tlahniam thung a. Tin, 2021-2022 -ah hian mipui tana inngahna tur hmasawna thar min thlenpui thei tur hian hmuh tur a awm lo a ni. ... (*Dy. Speaker-in chair a la.*) Kan budget pumpui atanga han thlir hian hmasawna thar, ruahmanna thar kan ram leh kan hnam tan beiseina min petu engmah hmuh tur a awm lo a, tihdan ngai bawkin kan kal leh dawn niin a lang a, budget atang hian.

Tin, a dang ka sawi leh duh chu - Capital Expenditure atana sum ruahman zat hi vaibelchhe 1,932.50 a ni a, chu chu budget estimate pumpui atangin 17.33% a ni. Hei hi hmasawna hna thawhna tur ber a ni nghe nghe a, 2021-2022 bugdet-ah Capital expenditure lo pung ta hi kan lawm rualin leiba rullhna a pung zel a. Capital expenditure-a sum ruahman zat cheng vaibelchhe 1,932.50 a ni. Heti chung hian hnathawhna tur tak tak erawh chu 12.71% chauh a ni dawn a, a chhan chu heta tang hian leiba eng emaw zat rullh tur kan nei a. Leiba kan rullh a ngaih dawn avang hian tun kan budget pumpui atang hian mipuite tana hmasawna hnathawhna tur tak tak chu 12.71% chauh hi niin a lang a ni. Mizoram hi India ram state zinga state rethei ber kan la ni a, engahmah intodelhna nei lo kan ni a, thawhchhuah pawh kan la nei baw lova. Ei leh barah kan intodelh lova, sum leh paiah pawh kan intodelh lova, chutiang chu kan dinhmun a ni. Engkim mai hi central atanga min pek kan dawn a la ni deuh vek a ni.

Chutiang dinhmuna kan din mek lai hian kuthnathawktute dinhmun chawikanna tur atan te, hmasawna tluantling infrastructure dinna tur entirnan, kawlpheha te, kawngpui agriculture link-road kan mamawh em em siamna tur atan te hian Pu Dy. Speaker, kan budget-ah hian kan mamawh thawhna tur sum ruahmanna hmuh tur a awm lova a paw hlein ka hria a, kan budget pum pui capital expenditure atang khan 17.33%-a pungin lang mahse leiba rullh tur kan nei baw si nen hnathawhna tak tak tur chu 12.71% chauh hi a ni. Chu chuan a entir chu, kuthnathawktute dinhmun chawikan, thalaite dinhmun siam, heng zawng zawng hi kan budget-ah hian a lang lova, a paw hlein ka hria a ni.

Tin, Finance Commission-in ram pum pui atanga chhiah tlingkhawm 41% chu state 28 te insem turin a recommend a ni tih kan Finance Minister zahawm takina a rawn sawi kha kan hria a. Heta tanga kan state chan ve tur hi 0.500% a nih thu tarlan a ni baw k a, chu chu a pawisa faiin vaibelchhia 3,327.82% niin a lang a. Tin, hetih mek lai hian kan state in sum kan indaih lohna phuhru turin Post Devolution Revenue Deficit vaibelchhia 1,790 hi 2021-2022 chhung hian min pe dawn baw k a ni. Chu chu 25.88%-in kum kal R.E. ai khan a pung tihna a ni a, a lawmawm hle a ni.

Amaherawhchu, kan Finance Minister zahawm tak speech-a a lan ang khan hei hi kumtinin a tlem tulh tulh dawn niin a lang a ni. Chuvang chuan, kan sum pai dinhmun hi a tha lo hle a ni. Tin, leiba kan neih a tam em em baw k a. Leiba hi kumtharah hian cheng vaibelchhe 10,491.20 ni tura chhut a ni baw k a. Chutiang chu tunah hian kan ram dinhmun

a ni a, kan sum leh pai dinhmun chhe tak a ni a. Chuvang chuan, Budget Speech-a kan hmuh ang hian mipuite phurrit hi kan bel leh dawn niin a lang a. Chhiah thar lakna tur awm lo mahsela chhiah lo lak tawh na atang hian chhiah heng, electric hman man te, tui hman man te, in hmun chhiah te leh a dangah chhiah tih pun tur a ni tih hi Budget-ah hian a lang a ni. Chuvangin, kan budget hi a pum pui han en hian mipuite phurrit nasa taka siam bellhna niin a lang a. Miretheite dinchhuahna tur te, kuthnathawktu te dinchhuahna tur te, thalaite hmakhua eng tur zawnga ruahmanna kan budget-ah hian hmuh tur awm lo te hi a pawl hle in ka hria a ni.

Pu Dy. Speaker, tawi te pakhat ka sawi duh a awm a, min lo hrethiam la. State Own Tax Revenue leh Non-Tax Revenue atanga pawisa kan hmuh tum zawng zawng te pawh hi budget bu-ah hian a rawn lang a. Tichuan, tawi tea ka sawi belh duh chu, state budget atangin cheng vaibelchhe 400 hi SEDP hnuaiyah dah a nih thu te, MNF Returnee chhawmdawl nan cheng vaivelchhe 5 dah a nih thu te kan hmu a. MNF Returnee te tana heti zat pawisa dah hi lawmthu ka sawi duh a. Tin, state budget atanga cheng vaibelchhe 400 SEDP atanga hna hrang hrang thawhna tura dah a ni te pawh hi a tha a. Amaherawhchu cheng nuai 3 inthlan dawna mipuite hnena sem in intiamna kha budget-ah hian a rawn ziak lang leh si lova, vaibelchhe 400 hi a chi tur anga sawi a ni leh bawk si a. He vaibelchhe 400 SEDP hian kan ram tan hian ei leh barah te, sum leh paiah te engnge min thawhchhuah sak ang tih te hi zawhna a awm lo thei lova. Pu Dy. Speaker, chungte chu ka han sawi lang tel hram duh a ni e. Ka lawm e.

**DEPUTY SPEAKER** : Tunge kan sawm leh ang? A hma lama sawi hi a tha a nia. A hnuah kan innawr leh si ang a. Awle, Member zahawm tak Pu Nihar Kanti Chakma ilo sawm.

**PU NIHAR KANTI CHAKMA:** Pu Dy. Speaker, ka lawm e. Vawiinah hei budget Chief Minister zahawm takin ni khata a pharh kan sawiho a ni a. Thu tam tak sawi tur kan nei lo a. Amaherawhchu, tun budget 2020-21 hi uluk takin ka lo chhiar ve a, para 3-ah sum leh pai enkawlina kawngah harsatna namen lo kan hmachhawn mek a ni tih kha Chief Minister zahawm takin a sawi a ni. Hei hian state sawrkar chu sum tam zawk puk lo thei lovin a siam phah bawk a ni a, hri leng avangin. Tin, para 7-ah, state sawrkar chuan sum leh pai tam zawk thawhchhuah theihna kawng a dap zel dawn a nia ti a. Pu Deputy Speaker, hetiang Chief Minister zahawm tak Finance Minister ni bawkin, a thu hmaa a sawi erawh chu a lang Chiang ta a ni, Mizoram budget hi. Pu Deputy Speaker, 2021-2022 atan a budget pum pui chu vaibelchhe 11,148.89 a ni a, a lawmawm hle a ni. 2020-21 aiin a pung a tam zawk a, a punna chu ₹433.89 crores a ni. Chumi rualin, Pu Dy. Speaker, he budget hi kan en chuan revenue expenditure ruahmanna chu ₹9,216.39 crore a ni, a total budget atangin 83.67% a ni a, a tam em em mai a ni. Capital expenditure kan en chuan ₹1,932.50 crore a ni a, budget estimate pumpui atangin 17.33% a ni a, mipui chan tur hi a tlem em em a ni.

Pu Deputy Speaker, kan hre vek a, hei economic survey kan chhiar kan chhiar a, Mizoram hi tun thlengin buhah kan la intodelh thei lo a ni. Nitin eitura kan mamawh a ni a, economic survey-a a lan dan chuan kum khata buh kan mamawh 1,80,000 metric ton anih laiin Mizoram-a kan buh thar theih zat chu, 2 6,239 metric ton chauh a ni a, a gap hi 1,19,761 metric ton lai a ni. Chuvangin, Agriculture Department hi thawh nasat a ngai khawp a, mahse budget speech-ah hi agriculture hi priority sector ah kan dah tlat lova, a paw ka ti hle mai a.

Hei, economic survey, Pu Deputy Speaker, i phalnain tawite ka lo chhiar ang a, a sentence hnung ber a ni a, “Despite the challenges, agriculture has been a way of life and would continue to be of the most important livelihood of the rural masses in Mizoram” a ti a, chutiang ni siin kuthnathawktute tan engmah a awm lo hi paw ka ti khawp mai. Example han sawi ta ila, kuthnathawka ei zawng kan tam hle a, a bikin ka bial chhungah mirethei harsa tak tak, kuthnathawka ei zawng an tam hle a, mahse budget-ah ngaih pawimawh a nilo ni hi paw ka ti khawp mai. Pu Dy. Speaker, ei leh barah kan intodelh loh chuan kan ram hi engtikah mah hma a sawn thei lo ang.

Hei, kan budget, para 18-ah kan hmu a, 2020-21-a state-owned tax revenue chu 719.56 crore a ni a, hei hi 2020-21 aiin 8.70% in a pung a, chu chu 57.87 crore tihna a ni. Tax thar lak loh tur anga sawi a ni si a engtingge hetiang a pun theih tih hi zawhna lian tak a ni. Chutiangin, non-tax revenue-ah pawh 852.26 crore a ni. Kum kal mek 2020-21-ah 583.7 crore a ni a, kum kal mek aiin 269.19 in a tam zawk tihna a ni. Hei hian mipui mamawh a phuhruk dawn em tih ka ngaihtuahnaah a awm a, engtin nge hetianaga a pun theih tih CM zahawm takin min hrilhfiah thei se ka lawm hle ang.

SEDP-ah 400 crore dah a ni hi lawmawm ka ti a, amaherawh chu, hei, ka bial hi a hlat tehlul nen, inthlan laia thutiam 3 lakh sem kha, 200 lakh chauh dah a nih si chuan mipuite tan 3 lakh dawn chu a beiseiawm lem lo a ni. (Dy. SPEAKER: Minute khat i la nei e.)

Pu Dy. Speaker, 2018-19-ah fiscal deposit 350.92 crore kan nei thei an ti a, mahse kum tin leiba a pung chho zel a ni. Fiscal deposit hi ram chhung economic dinhmun that leh thatloh tehna ber a ni a, hetiang leiba a pun nasat si chuan kan harsa hle dawn a ni. (**Dy. SPEAKER:** *I hun a tawp e aw.*) Leiba atam chuan liability a pung dawn tihna a ni a, a hnuah rulh leh a ngai a, interest nen a pung hle dawn a ni a, next generation tan tax te pawh hi an hnuchhiah sak tihna a ni. Chuvangin, Pu Dy. Speaker, he budget-ah hian, a bikin miretheite tan engmah lawmna tur a awmlo a ni. Awle, Pu Dy. Speaker, ka lawm e.

**DEPUTY SPEAKER** : Pu BD Chakma, Member zahawm ta kilo sawng.

**PU B.D. CHAKMA** : Py Dy. Speaker, ka lawm e. Kumin budget hi ‘budget ro’ ka ti a, engmah sawilo mai ang ka ti deuh naa, mahse Pu Dy. Speaker, i chair zahawmtak

hnuaiiah Pu BD-a hian a sawi vel loh chuan ni theiin ka hre lova. Chuvangin, budget chungchnag hi tawi tein ka han sawi ve ang a.

Hei, nikum Budget Estimate 2020-21 atanga kumin budget punna hi vaibelchhe 433.089 a ni a. Pu Dy. Speaker, ADC huam chhungah, MADC-ah Minister zahawm tak tiamin MLA pahnih an awm a, LADC atangin pahnih an awm bawk a, CADC ah pakhat a vaiin pangnga kan awm a. Kan budget bu ka han chhiar a, kumina kan budget pun dan a tlem a, chuti lain ADC pathumte tan chuan a figure tihdanglam miah lovin nikum budget anga dah tawp a ni; pawl ka ti khawp mai. Pu Deputy Speaker, chengkhat mah ti danglam lova, nikum budget ang chiah kumin budget-a thun a ni hi pawl ka ti hle a. Central atangin state budget hi tlema tihpun a ni a, crore 433.89 velin, chuti rualin ADC pathumte tan pawh hian tlema tihpun ve awm tak hi a ni a. Mahse chutiang nilovin nikum budget ang thlap (a figure thlengin) dah tawp a ni.

Pu Dy. Speaker, sum hmandan chungchang hi para-wise in ka sawi ve lo mai ang a, overall-in ka sawi mai ang a. Kan total budget atangin 80% vel chu revenue expenditure-ah a kal a, 20% capital expenditure-ah a ni bawk a, capital expenditure 20% chauh hi ram hmasawn nan engtin nge kan hman? Ka hriatsual loh chuan Pu Deputy Speaker, ADC pathumte a revenue expenditure hi 93% vel a ni thin a, 7% chauh non-salary atan dah thin a ni. Chutiang karah ADC pathumteah, a bikin CADC, Pu Rosik Mohon Chakma, CEM kaihhraina hnuaiiah chuan sawrkar hna appointment a ruka pek thin a ni a, training pek an ni bawk a ni. Session hmasaah pawh unstarred leh starred Question-ah ka zawt a, CADC hnuaiiah hian training-a hman tur budget ruahmanna a awm em tiin, 'Awmla' tiin min chhang a. Chuti ni si khawi atangin nge khami training expenditure hi an lak thin tih kha. Stipend te siam sakin, Law zirna ang chi tan ₹44,000/- bawr vel trainee pakhat tan an seng thin a ni. Chutiang karah CADC Executive Committee te hian khawi sum atangin nge hna an pek thin, khawi atangin nge pawisa an hmuh thin tih hi. Hetiang zawnga kan kal a nih chuan, ADC pathumte dinhmun hi a la chhe hle dawn a ni. Chuvangin, Financial Control & Administration hi siam that anih loh chuan nakin zelah buaina a awm ang tih ka hlau a ni. Chumi ngaihtuahin, ADC pathumte natna hi state sawrkarah ah pawh a kai tan deuh em ni aw ka ti deuh a. 80% revenue expenditure a tana daha, 20% capital expenditure a nih chuan, khaw atangin nge tui thiangkim te, kawng that e kan neih tehlu ang ni ka ti a ni.

Tin, disbursement lamah pawh priority sector anga dah a ni a 'social, general service.....' tihloh theihloh a nia, kha kha chu pawl ka ti lova. Social sector-a 36.057 chauh dah hi tlem deuh lo maw ka ti a, Pu Deputy Speaker. Hei pawh pawl kan ti hle a, a bik takin nimirah group hrang hrangah kan chhiar a Health a hi dah hniam lutuk, chutiang zelin Health te, Education te, PWD leh PHE te hi kan ngaihtuah loh chuan ram hmasawna engnge awm ang? Tin, Agriculture Sector pawh hi priority sector-ah dah a ni lova, Economic Service Sector erawh chu dah a ni a. Agriculture Sector, buhfaiah hian 20 emaw 30% emaw chauh kan tharchhuak a, amaherawhchu priority sector-ah dah a ni lova, hetiang chuan engtinngge ramin hma a sawn theih ang ka ti a ni. Sport Infrastructure lian pui pui golf

course ropui tak tak neih hi engnge a awmzia, chaw ei tur kan neih si loh chuan? Assam nen buaina a awm apiangin Vairengte gate emaw Kanhmun gate emaw khar a ni a, chaw kan nghei tep thin a ni hi. Hei hi chu a pawl khawp mai, buh lampanga intodelhna kan neih a ngai, chu chu kawng tha tur a ni.

CAG report-ah pawh kan hmu a, tun sawrkar chauh nilo sawrkar hmasaah pawh hetiang zawnga report hmuh thin a. Budget-ah thil pakhat an ziaa a, mahse a implementation reappropriation-ah diversion a awm zel a, pawl kan ti khawp mai. Heng hi priority sector-wise an tih loh chuan ram hmasawna kum 50 pawh nise awmzia kan nei dawn lo a ni. Pu Deputy Speaker, chuvangin priority sector, a bik takin Agriculture hi ngai pawimawh turin ka ngen duh a. Tin, hei MLA fund chungchangah pawh allocation-ah priority sector ah a dah a ni a, nikum Covid hrileng avangin keini MLA zawng zawngte pawhin kan tuar a. MLA/LAD fund hman dan guideline kan hmuhah hian, vawihnihah 50/50-in pekchhuah tur tih a ni a, mahse nikumah a then chauh pek chhuah a ni a. Covid do nan mamber te'n contribution kan salary atangin 30% kan pe tawh a, chumi piah lamah kan MLA/LAD fund nuai 15 tuma hriatpui lovin cut a ni a, mahni biala plan kan lo neih sa zawng zawngin awmzia a nei ta lova. Chuvangin special request ka siam duh chu, Pu Deputy Speaker, MLA fund hi guideline angin 50/50-in vawihniha semin D/C Account ah lut se MLA te pawh hian work proposal kan neihte hma kan la thei tur a ni a. A bik takin dry season leh winter season atan vawihnihah sem thei se. Ruahsur laia thawh tumin awmzia a nei lo, hnathawh hun a ni flat lova. Chuvangin tunah pawh he 50% hi April thla velah chhuak thei se, mipuite tan, ram hmasawn nan prososal kan theh lut thei dawn a ni.

Pu Deputy Speaker, budget pum pui kan hmu a, central atangin hmu tlem pawh ni ila nikum aiin cheng vaibelchhe 400 velin a pung hrim hrim a, engpawhnise kan pawisa zawng zawng hi anihna turah hmang ila tih hi ka ngen duh a ni e. Pu Deputy Speaker, ka lawm e.

**DEPUTY SPEAKER** : Member zawhawm tak Pu Z.R. Thiamsanga ilo sawm ang.

**DR. ZR. THIAM SANGA** : Pu Deputy Speaker, ka lawm e. Kum 2021-2022 budget estimate kan han sawi thei hi a lawmawm hlein ka hria a. Kan hriat angin Covid-19 avangin keini North East India states mai nilo, India pumpui bakah khawvelin harsatna lian tak mai kan nei a. Chutiang kara Budget Estimate pharh thei a lo ni hi a lawmawm hle a. Ka lo rin dan chuan kumin hian kan pharh theilo mai awm mang e aw, he harsatna hianin namen lovin min chimbuai mai awm mang e kan tih laiin, Pathian leh kohhrante, sawrkar leh NGO te kan tan rual thatna avangin kan ram dinhmun pawh Covid-19-ah chuan a ziaawm berte zinga mi kan ni a. Chuvang chuan he budget pharh theia kan awmte pawh hi a lawmawm khawp a ni.

Tichuan, hripui avangin nikum chhung zawng khan hmuh theih leh hmuh theihloh thlengin kan nunphung hrang hrangah min nghawng a. Tin, khawvel ram hrang hrangte pawh hian an duh angin sum hman tur an nei bik lo tih kan hria a. BBC chanchinthar Ni 18.1.2021-a kan en chuan, khawvel ram ropuite zinga chhiar chhoh mek China economy pawh kum 40 chhunga an ram economy thanna hniam ber tum tawngin, 2.3% chauh a ni. Tin, July, 2020 khan China-a khauh taka lockdown an kalpui result a lo lang chhuak a, khawvela economy thang leh hmasa ber anni chho a ni. China pawh an buai khawp a ni. Tin, Economics Times, Ni 12.2.2021-in a tarlan dan chuan, United Kingdom economy pawh hripui avangin nasa taka tlahniamin, a tlakhniamna hi 9.9% lai niin, kum 1709 hnulama an ram economy tlakhniam ber tum an tawng a ni. Chutiingin USA pawh kum 1946 hnulama an ram economy tlakchhiat ber tum tawngin, 3 trillion pounds zet sorkar sum bawm atangin mipuite ei leh bar leh an harsatna chhawmdawl nan an seng hial a ni.

Hemi avang hian Pu Deputy Speaker, khawvel ram ropui tak takte pawhin Covid-19-in a ben hniam lai mek hian keini India ram pawh hi kan bang bik lova, chuvangin central atanga sum kan hmuh tur a tam loh avangin kum dang angin tun kuma kan budget pawh hi duhthu a sam dawn lo a ni tih a chiang a. Chuvangin, India ram puma kan sum khawnkhawm (revenue collection) a tlakhniam tak avangin kan sawrkar laipui atanga sum kan hmuh tura kan beisei, BE 2020-2021-in a tarlan pawh vaibelchhe 1,185 zetin kan dawng kim ta lo a, chu chu 29.86% zet a ni. Hetah hian hripuiin min nghawng nasat zia kan hmu thei a. Budget hi sawisel duh hrim hrim kan awm a nih pawhin hei aia tha hi chu hripuiin kan ram economy a sawi mek karah hi chuan thil harsa tak tur niin alang a ni.

Khawvel ram ropuite economy meuh pawh na taka a nghawng lai leh duh anga sum leh pai hman tur an indaih bik loh laia keini central sorkar-a innghat tan chuan duhthusam budget pharh hi chu thil har tak tur a ni. Hetiang hian kan Chief Minister zahawm tak Pu Zoramthanga'n 1<sup>st</sup> March, 2021-a kum 2021-2022 Mizoram Budget-a pharh tak hian duhthu sam lo mahsela kan ram tana thil tha a awm a ni tih sawi tur tam tak a awm a ni.

A hmasa berah chuan, hnam sipai MNF returnee-te dinhmun harsat zia kan hria a, anmahni chhawmdawl na tur a crore 5 dah a ni hi a lawmawm khawp mai. Tin, hetiang karah hian revenue hmuhbelhna tur kawng a zim hle chungin kum lo awm turah hian revenue surplus crore 579.42 neih kan tum ngam ringawt pawh hi he kan sawrkar tumruh zia leh a huaisen zia tilangtu a ni. Hripui karah chona ropui tak niin a lang.

Tin, kan sawrkar leiba tlingkhawm kha kan hria a, kum tharah crore 10,491.2 ni tura chhut kha a ni a, hei hi debt GSDP ratio chuan 27.63% a ni a. Tun hnai kum 5 chhung hian kan phurhazawh tawh tur leiba enkawl na (debt sustainability) kawngah hian kan ram hian hma kan sawn hle a. Kum 2016-2017-ah khan 41.00% a ni a, 2017-2018-ah 41.85%, 2018-2019-ah 32.89%, 2019-2020-ah 32.72% niin 2020-2021 RE-ah 28.52% leh 2021-2022 BE-ah 27.62% te a ni a. Kan leiba tlahniam zel hi he sawrkar Pu Zoramthanga kaihrui hian hripui karah pawh kan ram tan theihtawp a chhuah zel a ni tih a tarlang hle a ni. Chuvangin,

sawrkar inenkawlina leh hnathawkte hlawh (revenue expenditure) nikum aiin 2% in a hniam a. Hei hi a lehlamah chuan capital expenditure nikum aiin a tam phah a, a lawmawm hle a. Chuvangin, Covid-19 avangin kan mipuite dinhmunin kum dang pha lo mah sela, mipuite dinhmun hre chung a mipui tana phurrit, chhiahlak tharna tur a awm lo turte hi ‘mipui hmakhawngai tak budget’ tiin kumin a kan budget hi a sawi theih niin a lang.

Tichuan, sum leh pai harsa tak karah pawh sawrkar-in flagship programme SEDP atan a crore 400 lai a dah te hi a lawmawm hle a. Ni e, nuai 3 kan pe ang tih te kan sawi thin a, a lehlam atangin, amaherawhchu, Pu Deputy Speaker, nikum lamah khan hetiang boruak chhia hi nei lo ta ila SEDP atana kan sum dah zawng zawngte kha project base-in sawrkarin a tum ang hian kaltluang thei ta ila, nuai 3 mai nilo, a aia tam pawh mipui hian an dawngin a rinawm a. A sum faia pek tur tihna pawh a ni chuang lova, he thil hi project base-in kan ti ang a, mipuiten hmasawn nan, eizawn nan kan hmang ang kan ti a ni. Nikum boruak karah khan project a siam theihloh a, central-ah lockdown puan a ni a, hna kan thawk thei lova, vawiin thleng hian mumalin kan thawk thei lo a ni. Chuvangin, kha kha sawi sawi chi a ni pawhin ka hre tawh lova, boruakin a zir miao loh chuan thil hi duh angin a kal thei lo a ni tih hi hriat tur a ni. Chuvangin, tunah pawh hian theih tawp kan chhuah dawn a ni. Tin, Cooperative Society-te hi mirethei leh thingtlang mite pawhin ei leh bar zawn nan an hmanna tur pawimawh tak a ni. Heng atana crore 10 kan dah pawh hi mipui, thingtlang mite, kuthnathawk mite sawrkarin a ngai pawimawh tih a chiang hle a. Heng atang hian subsidy-in loan an han la chho ang a hmasawna tam tak a hmu dawn a ni.

Tin, MLA fund pawh Covid-19 avangin kan han pe a, a lawmawm khawp mai. Amaherawhchu, hetiang sum harsa tak karah pawh kan CM-in hetiang MLA fund thingtlang leh mirethei leh bialte tana hman tur pawisa a ngaia min pe leh theite hi thil ropui tak a ni. Chuvangin, tuna kan budget hi tha ka ti a, duh ang zan a tha chu a ni lo mai thei, mahse he budget chhungah hian mipuite tan, miretheite tan budget tangkai tak a ni tih a chiang a. Nichianah khan kan sawi a, mipuite, thingtlang miretheite tan he budget hi a thleng pha lo e kan han ti a, capital expenditure-ah a tlem thute pawh kan han sawi a. Amaherawhchu, lehlamah Agriculture te pawh kan hmu a, tamtak sum kha dah a ni tih te kha kan hriat a tha awm e. Chuvangchuan, Pu Deputy Speaker, he budget hi pass ngei turin ka rawn thlawp a ni. Ka lawm e.

**DEPUTY SPEAKER** : Tunge kan han sawm leh ang le? Aw, Pu Andrew H. Thangliana, Member zahawmtak i lo sawm ang.

**PU ANDREW H. THANGLIANA:** Pu Deputy Speaker, ka lawm e. Kan budget hi a vaia kan inbuatsaihna ang te kan sawi hman lo ang a, pawimawh ka tih em em Agriculture & Allied atan capital expenditure engmah dah a ni lo lai te hi mak ka ti a. Covid avanga kan economy chhia, a sustain nana a backbone chu Agriculture & Allied sector hi a ni tih kan hria in ka ring a. Centrally Sponsored Scheme hrang hrang a awm a, 11 lian zual NMSA (National Mission for Sustainable Agriculture), hei hi tui lam, Farm Water Management



lam khawih a ni a, heng ang te, PMKSY tui hnianghnar zawk kan neih theih nan department hrang hrang in a convergence hmanga kalpui te chu kan ramah hian kan apply ngeiin ka hria a. Hemi ni lemlo, central atanga pawhchhuah theih tur kan la khawih loh hi a la awm in ka hria a, Traditional and Organic Farming tih lam PKVY hnuaia central-in financial assistance ₹50,000 crore per hectare atana a dah ang chi te kan zuk tham thiam a ngai hlein ka hria a.

Tin, Micro Irrigation Fund Scheme, PMKVY-in a cover zawh loh corpus fund ₹5,000 crore central-in a dah ang chi ah te beng chhi deuh ila tih vawiin ni ah hian kan sawi duh a. Tin, Kisan Credit Card te a awm a, farmer ten agriculture expenditure a huntak a pawisa an hmuh theihna tura heng ruahmanna a lo siam ang chi te, tun session-ah pawh ka lo sawi tawh, Soil Health Card kan tih hi a taka kalpui a tha in ka hria a. Kan lei da leh chhe mek nutritional deficiency kan loa awm thin te hi kum khat emaw kum hnih dana mumal taka kan monitor theih nana Soil Health Card farmers te hnena han pek a, Soil Testing kan neih te pawha han hriat zung zung theihna tur leh kan lei tha fertilizer te awmze neilo leh a hek zawnga hmang vak vak lo a kan kalpui theihna kawng te pawh hi rilrua neih atan a thain ka hria a. Tin, vaibelchhe 34,422, 'solar and renewable energy for farmers' PM Kusum tih te pawh hi nasa zualin kalpui ila. Hei, drip irrigation atan te leh tui chhek khawl nan solar pump hmanga khawiah emaw tui pump mai theih ang chi te hi chu kei ngei pawh in ka hmang a, a tangkai em em a, a hautak lo bawk a chungte chu ka tarlang duh a.

Tin, Supplementary Demand chungchang hi tlem han sawi ve ka duh a. Annual Financial Statement atanga en chuan nikumah salary and wages te pension-ah 54% a kal lain tunkumah hian tihhniam a ni ta a, capital tihpun nana sorkar-in a ruahman nge ni 52% ah tihhniam niin ka hria a, hei hian zawhna a siam thei bawkin ka hria. sawrkar hnathawk tuna kan neih mekte hi ban emaw an hlawh tihhniam tumna a awm em ni tih te pawh a ngaihtuah theih in ka hria a. Tin, thil pakhat, detail-a hriatthiam a har a, *Other Charges* chungchang hi budget demand for grants-a lang a awm thin a, medical reimbursement atan te leh domestic travels hi *office expenditure*-ah ziah chian anih lain *Other Charges* hi eng atana hman nge a nih tih zawhna a awm theiin ka hria a. 5% budget pumpui atangan a kal si a, sawi tak ang khan Agriculture & Allied Sector atan Economic Services Sector-ah Agriculture & Allied-a kan hman aia a let 5 kan hmang tihna a ni a. Department Head leh Secretariat ten duh thala hman atan hian a tam lutuk deuh em tih te ka ngaihtuah a. 'Austerity measures' kan ti a, kawng engkimah MLA fund, mipui bial, mipui sum kan bial develop-na tur te thlengin pawhhniam a ni tih kan hre mek a, chungte chu vawiin niah hian ka sawi lang ve duh a.

Tin, 'Repayment of Borrowings' Annual financial statement-a kan hmuh angin 4.5% lai a kai tawh a, kan financial rules FRBM chuan 'upto 10%' ti tho mahsela, GSDP atanga 3%, kan revenue receipt atanga 10% tih a ni a. Tuna mi hi chu expenditure pumpui atanga 4.54% *state own revenue* atanga chhut a ni a, loan rulh nan kum khatah crore 514, 35% vel kan *own tax revenue* atang kan hmang tawh dawn a, hei hi a la pun zel pawh a rinawm a. Tichuan, chhut chuan kum 3 chhung hian kumtin 500 crore aia tam hi kan puk tihna a ni a,

kum 3,4,5 lo kal leh zel turah repayment atana kan hman hi a pung zel dawn te pawhin a lang a. *Borrowing Limit* kan tihpun chuan sawrkar tur leh thangthar te tan phurrit kan siam zel dawn a ni a, heng te pawh hi kan financial statement hrang hrang kan en chuan en nawn a ngai hle in ka hria a ni. Chungte chu vawiin ni hian tawite in ka han tarlang ve duh a ni e. Ka lawm e.

**DEPUTY SPEAKER** : Awle, Member zahawmtak Pu Zothantluanga i lo sawm ang.

**PU ZOTHANTLUANGA** : Pu Deputy Speaker, ka lawm e. Hei vawiin, March Ni 1, Thawhtanni-a kan Chief Minister zahawmtak Pu Zoramthanga'n kum 2021-2022 atana budget puitling a han pharh theih kha a lawmawm takzetin ka hria a. Tunhmaah kha chuan Central Planning board atanga kan sum hmuh tur a hriatchian theih thin loh avangin *Vote on Account*-a budget pharh fo a ni tih kha ka hre vek a. Tichuan, central sawrkarin tihdan thlakin Planning Commission thiatin Central atangin state-te ina sum leh pai kan hmuh tur dan thar angin ruahmanna a lo kal chho ta a, chutiangchuan vawiinah budget puitling kan han nei thei hi a ropui hlein ka hria a. Kum dangah chuan budget hi March thla tawp lamah te kan pharh chauh a ni a. Chuvang chuan, sorkar kum tharah sum leh pai hman danah nasa takin sawrkar hanthawkte, sawrkar a kal buai fo thin a. Nikum 2020-2021 budget-ah khan kum danga la awm ngai loh kan Chief Minister zahawmtak khan February thlaah budget lo pharhin pass hman a lo ni kha a ropui a, Mizoram-ah a vawikhatna a ni a, sawrkarin sum a ruahman te Finacial Year tawp lai hun tam tak an la neih laia Assembly-in budget kan lo pawm hman avanga sawrkar hnathawkte inruahmanna leh sawrkar hnathawkte'n harsatna awm loa sum an han hmang thei te kha kalphung thar, Pu Zoramthanga sawrkarin a lan chhuah tirna ropui tak niin ka hria a, a ropui hle a ni.

Kuminah pawh Covid avanga harsatna kan tawh vang pawh a ni ang e, hei aia hma zawka Assembly han koh theihna remchang a awm lo a ni ang a, chuti chung chuan March Ni 1-ah budget a pumin a present leh thei te hi a ropui a, kan programme anga a kal chuan Ni 17-ah kan pawm hman dawn niin alang a. Chuvang chuan sawrkar kum hluih pawh thil tam tak inruahmanna tur te, inbuatsaihna hun tur te awm theia kan han kal thei hi kan Chief Minister inpekna te, sawrkar anga a mawhphurhna te a hlen tha in ka hria a, fak a phu hlein ka hria a ni.

Tin, kan hriat theuh angin nikum budget-ah khan budget kan pawm chauh tihin Covid-19 hripui lengin khawvel hmun dang zawng zawng bakah India ram, Mizoram thlengin kan tuar chho kha a ni a, hemi inbuatsaihna atan leh hripui a darh lohna atan kan hun tam tak kha *Lockdown* nan inkhar khip nan kan hmang a, mi tam zawkte kan kut hnathawktu te, kan industry neitu te leh company-a hna thawk zawng zawngte pawhin an thawk thei lo va, kan hun tam berte kha kut hnathawktute thlengin hri a darh lohna tur atan kan inbuatsaihna te, kan kalphung kan *Lockdown* zin zia te, Mizoram pawhin kan tuar a ni tih kan hria a.

Tin, keimahni chauh kan ni lova, kan sum hmuhna ber central-ah tax la turin company lian leh te te pawhin hna an thawk thei bik lova, chutiang chuan hnathawktu a lian ber atanga a te ber thlengin sum leh pai thawkchhuak zawng te, ei leh bar tam zawk hmuchhuak thei turtein kan thawh theih loh zia chu kan hre vek a. Central pawhin sum leh pai, tax a hmuh theihna chu mipui thawhchhuah atang thoin a ni a, hnathawh a theih si loh chuan chhiah pawh a lo tam thei lo a, State hrang hranga central-in kan hmuh tur chhiah a lak khawm tum leh a beisei ang a hmuh loh avangin state dang zawng zawng pawhin hemi avang hian kan tuar vek a ni tih kan hria a ni. Mizoram pawhin nasa takin kan tuar a, kan budget atanga central-in min pek tur atangin crore 1,585 chuang zet mai min han pe thei lo a. Tin, thil chi hrang state-in a hmuh kan beisei te nen phei chuan vaibelchhe za tel teh meuh khan kan hmu tling lo a ni a, min pek tur a nei lo a. Kan beisei leh min pek tur anga ruahman sa pawh min pe lo chung chung a kan sorkarin central budget emaw state budget atang emaw ni loa kan sawrkarin nasa taka hna a lo thawk si te hi a ropui ka ti a, khatiang dinhmun khirh taka kan ding chung a kan sawrkar chak takin a state budget ruahmanna pawn ami sum a hailuh nasat zia chu hmanni Private Member Resolution-ah pawh khan sports chungchangah te kan hmu a, kan budget pawn ami avangin hmasawna infrastructure lian pui pui te kan lo nei a. Kan Chief Minister te, kan hotu tam tak te hnathawh tanna tur lungphumin kan hmanhlel a ni tih kan hria a.

Tin, AMC election-a Election Model Code of Conduct avangin kan Chief Minister leh kan Minister dangte hmasawna ruhrel tam tak lungphum tur la awm an phum hman loh dan te kan hria a. Tunah pawh hian project thenkhat chu han hawn theih mai turte leh a lungphum, a hna bul tanna tur buatsaih tur pawh tam tak kan la nei thei te hi a ropui a, hei hi hmasawna ropui tak leh kan sawrkar, Pu Zoramthanga kaihhruai ina hmasawna a ngaih pawimawh zia leh a huaisen zia pho chhuahna niin ka hria a, kan Chief Minister leh Minister zahawm tak takte an fakawm hlein ka hria a ni.

Tin, thil lawmawm tak mai pakhat chu, kan budget pharh tak pum pui atanga mipui hmasawna tur sum tam zawk dah hi a ni a. Budget kal lai kan hman mekah hian mipui hmasawna atana ruahman chu 15.80% a nih laiin March Ni 1-a kan budget pharhah erawh kha chuan 17.33%-ah alo chho ta a ni. Chuvang chuan sum harsatna nasa tak kan nei chung pawha sawrkar inrelbawlina tura sum dahah khan nikum aiin a lo tlahniam ta a, nikumah 84.20% a nih laiin kuminah erawh chuan 82.67%-ah alo tlahniam ta a. Sum harsatna namen lo Mizoram kan tawh lai pawha hetiang a tul anih chuan kan budget hmuh sa atanga han tihhniam ngamna thinlung te pawh hi a tha ka ti a. Tin, keimahni state-in kan thawh chhuah kan *own tax revenue* ruahman hi kan budget speech atang khan 16.05 ni tura chhut a ni a. Hei hi GSDP atanga 4.14% a ni a, chuvang chuan chhiah mipui laka sang zawka lak tumna emaw, chhiah tihpun tumna emaw lampang ni lova, chhiah rate tihpun emaw, mipui retheihna tur zawng ni lova, kan chhiah lak thin pangngai kan lak loh te, chhiah lak dan changtlung zawka kan lakna leh kan inpekna atanga lo pung tur atanga tih tur a ni a, hei hian mipui tan harsatna a thlen lo a ni tih kha kan hria a ni.

Tin, 2018 Election-ah mipui hnenah commitment kan party in kan nei a, chu chu sum leh pai harsatna nasa tak karah mipuite hamthatna atan SEDP-ah 400 crore lai mai dah a lo ni te, Mizoram ram leh hnam din chhuahna atana thisen far tawp thlenga inpe tawh thin kan MNF Returnee-te tana 5 crore lai mai dah a ni te hi a ropui a, a lawmawm takzetin ka hria a. Pu Deputy Speaker, kan bial theuh mipuite hian kan MLA fund hi an thlahlel em em mai a, hmasawna atan veng tinah kan han hmang theite hi kan mipuite an lawm em em a ni tih hriaa kan MLA area development fund atana 60 crore lai mai dah leh a ni ta te hi lawmthu han sawi lohna chi niin ka hre lova. MP ten an area development fund atana kum 2 lai mai an neih loh laia kan bial mipuite tan, bial tin te tan hetiang zat min han dahsak leh te hi a ropui ka ti a. Pu Deputy Speaker, sawi tur tam tak karah hun duh aiin a tawi a, min lo hrethiam dawn nia. Ka lawm e.

**DEPUTY SPEAKER** : Tunge kan sawm leh ang? Member zahawm tak Dr. Vanlaltanpuia i lo sawm ang.

**DR. VANLALTANPUIA** : Pu Deputy Speaker, ka lawm e. Kumin financial year 2021-2022 atana kan Budget, kan Chief Minister zahawm tak, Finance changtuin a rawn pharh hi a lawmawm ka ti a, kumdanga kan tih ngailoh angin hma takah pharh a lo ni leh ta a. Nikum lamah kan introduced a, kuminah pawh kan han ti chhonzawm leh ta a, financial year tawp dawna pawisa inchuh ruih ruih ang chite, sum tam tak lo tlingkhawm tawh release ruih ruih ngai ang chi harsatna te tibo tur ang zawngin hma takah tiang hian inbuatsaihna an han kalpui hi a lawmawm ka ti a. Tin, Finance Department lama thawktu zawng zawngte an thawhrim ziate ngaihtuahin lawmawm ka ti a. Tin, sawiloh theih loh Covid-19 avanga hun harsa kan tawh lai a ni a, khawvelin hun harsa tak mai kan tawk a, kan ramin harsatna kan tawk a, chumi avanga buaina namen loh kan tawh laiin, chung hunlaia hetiang ang Budget Estimate han exercise chu a har hle in ka ring a, churang chuan Department lam pawh an fakawm ka ti a, hma taka hetiang pharh theih a ni hi lawmawm ka ti a ni.

Tin, kan Chief Minister, Finance lama experience nei tha tak mai leh hun rei tak Mizoram politics te lo kaihruai tawh tu tura ram hruaitupa ber in Finance a han chang a, kan sum bawm a han enkawl a, a chhiat a thatah mawhphurtu nia a rawn pharh hi a lawmawm ka ti a, a inpekna zawng zawngah lawmthu ka sawi a ni.

Kan Budget awmdan, engtin nge sum kan hmuh a, engtin nge a chhuah dan tihte hi phak tawk tawkin han sawi ve ka duh a. Thil harsa tak mai a ni a, expert lo tan pheih chuan authority neia thu han sawi ve hi a har em em mai a, amaherawhchu kan zir phak tawk tawkte kan hmuh phak tawk angin han sawi ve ta ila. Mipuite pawhin an hriat atan te pawh thil pawimawh a awm bawk a.

Kum khata pawisa lut chhuak zawng zawng han exercise a, heti zat a lo lut ang a, heti zat a chhuak ang a tih hi Budget kan tih chu a ni mai a, chung chu a tlangpuiin receipt leh expenditure atana ruahman a ni a. Receipt-ah chuan kan pawisa hmuh tur zawng zawng

entirnan, heng hi a source puitling a ni a, heng atangte hian kan hmu thei ang, hengte hi kan hmuh thin dan a ni, kan tih ho kha a ni a. Expenditure chu - heng hi pek ngei ngei ngai a ni a, heng ho te hi pek ngai ho tur kha a ni tia ruahmanna te kha a ni a. Chungah chuan receipt-ah hian share of taxes, tax devolution kan han tih chinte kha a lian pakhat a lo ni a, tah chuan India rama tax tlingkhawm zawng zawng 41% kha State 28 in kan insem ta thin a, chu chu tax devolution kan tih a ni a, share of taxes atangin sum kan la a. Tin, State own tax revenue te, state own tax non-revenue te, grant-in-aid kan han tihah khan a lian zualah post devolution revenue deficit grant kan tih te, local bodies chutah chuan rural (thingtlang ho) inenkawlna turte, urban inenkawlna tur tihte a lo awm a. Tin, chhiat thulhah, monsoon tuar ram kan ni a, chhiat thulhah kan inenkawlna tur disaster management respond fund ang chite, projects leh schemes ho hrang hrangte, Ministry atanga kan hmuh hote, entirnan NLCPR atanga kan hmuh hote, NEC atanga kan hmuhte, CSS atanga kan hmuh hote a ni tlangpui a. Tin, chubak chu EAP kan hmuhte leh open market borrowing, market atanga pawisa kan puk theih ang chite, heng ho hi a ni ber mai a, kan state anga tan chuan, Pu Deputy Speaker. Chuvang chuan, han sawi ngial thin mah ila kumin budget chu, a chhe hle mai, a tha hle mai han tih tur vak hi keini ang state te tan chuan a awm lova. A kalphung hi state lian ten entirnan corporate lian deuh te, company te, private firms and company nei tha deuh tena eng engemaw sorkarah an worker te tana provident fund an lo pek ang chite, sorkara an tax chhunluh ang hrang hrang tamna hmun ang chite nen chuan inkhaikhin hleihtheih hi kan ni lova, kan pawisa source hi a nghet sa em em mai a. Chuvang chuan hei bak hi chu kan pel hleithei chuang lova, kuminah pawh harsatna kan tawh karah pawh hian a tak takah chuan kan pawisa hmuh tur hi tlemna, a then hi a head-ah hian a kiam deuh e tih a ni mai a, chuti em ema han chhia kha a awm chuang lova. Chuvang chuan, heng ang kan pawisa hmuhna thin hrang hrangte hmu tur anga kan la awm pawh hi a lawmawm ka ti em em a ni. Amaherawhchu, mit la zual, tlema mipuite pawhin kan hriat a, harsatna kan tawh zualpui ho hi han en ka duh a.

Nichina ka sawi tak ang khan consolidated tax collection, India rama tax lut zawng zawng atanga 41% kan insem turah kumina kan chan turah hian vaibelchhe 3327.82 ah hian nikum financial year-a vaibelchhe 3967.96 atanga kan hmuh tlemna tur tak hi vaibelchhe 640.14 a ni a, hei hi a tlem sawt mai tih hi mipuiin kan hriat a ngaiin ka hria a.

Tin, kan hriat angin 14<sup>th</sup> Finance Commission 2019-2020 ah khan post devolution revenue deficit grant-ah khan state 7 chauh pek a ni a. Chumi hnuah chuan 15<sup>th</sup> Finance Commission –ah khan state 14 ah tih tam a lo ni leh ta a, kuminah hian state 17 laiah sem darh tur a lo ni a, a tlem telh telh mai a ni tih kan hmu bawk a, chu chuan kan budget-ah hian chona lian tak min pe a ni tih hi enchian a ngaiin ka hria a. He kan deficit grant hmuhna hi kum telin a tlem chhoh telh telh dawn avangin chona a lian em em a. Keini sawrkar enkawltute tan pawh hian chona lian tak a ni a kan ram economic management hi, kan kutah a awm a ni tih hria a thahnemngai taka hei hi kan zirchian pawh a ngai a ni tih te ka'n sawi duh a.

Tin, revenue expenditure leh capital expenditure ah hian mit la zual pakhat a awm a, hei hi mipui pawhin social media ah te leh kan budget analysis-ah te kan zirchianna ah te hian hei hi kan sawi uar ber pakhat a ni a. Kum 2021 - 2022 ah hian capital expenditure tih chu kan hnathawhna tur atan 17.33% hi kan BE, kan budget pumpui atangin hman tur a ni a. Hei hi hna thar thawhna tur atan te, hmasawwna tur ruhrel lian tha thawhna tur atan te hian a tlem lutuk a ni, budget chhe tak a ni tih thawm te ka hria a. Amaherawhchu chumi lai chuan revenue expenditure ah hian kan inrelbawlna, sorkar inrelbawlna atan hian 100 zelah 82.67 a kal daih a chuang chuan hei hi hnathar thawhna tur a awm love tiin kan sawi uar hle a. Amaherawhchu hetah hian chiang taka sawilan ka duh chu khawvel inawpna dan kan system-te a in ang lo em em mai a entirnan Europe ramah te pawh sorkar thenkhat chu entirnan Germany kan tih te pawh Angela Merkel-i te sorkar chu tereuhte a ni a, amaherawhchu chutih lai chuan private company leh firms ten sawrkar an chawi nung em em a sawrkarah chuan mi an tlemte awm zawk a, an expenditure pawh a tlem a mahse keini chu hetah hian han sawi ta chiah ila, chhung tin hi inzawt ta ila a nih leh revenue expenditure hi ti tlem turin sorkar te deuh siam ang aw, expenditure te deuh siam ang aw ti ta ila kan duh em tih hi zawhna lian tak niin ka hria a. Chuvang chuan tak takah chuan chhung tin hian kan fate zawng zawng hian sawrkar hna hi hmu se, sorkarah hlawh la se an ti vek, kan ti vek. Chuvang chuan a system hi kan siamtha a nih loh chuan kan budget pawh hi a dan a dang daih a ni. Chuvang chuan Pu Dy. Speaker, helai hi ka sawi duh chu hei hi kan hriat a ngai, choice hi kan kutah a awm a, amaherawhchu kan kutah a awm kan tih lai hian kan siamtha thei chuang lova, a ram kaihhrui dan hrim hrim hian, hei hi kan nihphung a nih avangin. India ramah te chuan sorkar lian tak private company -te te zawk a nih tlangpui avangin kan revenue expenditure hi a tam lo thei lo hrim hrim a ni tih hi vawiin ah hian House-ah hian sawi ka duh a.

Tin, ka sawi leh duh pakhat chu, CSS te pawh, entirnan hindi zirtirtute pawh engemawzat chu 'for a term of 5 years' minrawn pe a, kum 5 atan minrawn pe a, mahse an hlawhte pawh tihtawp a lo ngai leh ta a. (**Dy. SPEAKER:** *Minute 1 kan la nei e.*) Pu Dy. Speaker, hei kan chawl dawn tho a, helai hi chu min sawi zawh tir em ang chu maw. CSS Scheme a mi te pawh hlawh te anrawn titawp ta a, a bak dang chu State Government in lo chhunzawm rawh se, lo pe chhunzawm rawh se te an ti thin ta a. Chuvang chuan chung chu mipui zawng zawng chhungtin khan kan beisei vek tho a, chuang chuan chutianga nih chuan revenue expenditure hi a pung lo thei lo a ni tih hi vawiin ah ka'n sawi duh a ni.

Tin, chutih lai karah chuan kan C.M zahawm takin hun harsa tak karah SEDP atan sum tam tak dah hi a lawmawm ka ti a, sawrkar inkaihhruiaina conventional practices pangngai ho kha chu a kal dan pangngai khan a kal tawh sa a, sectoral budget allocations pawh kha documents minrawn pe sa vek tawh a. General Service Sector (**Dy. SPEAKER :** *Kan hun a tawp tawh a*) Social Service Sector-ah te, Economic Service Sector-ah te sum a rawn dah vek tawh tho a chumi bang zawngah chuan SEDP atan mipuite chanvo turin vbc. 400 a rawn dah hi chu ala tha veng vawng viau lo maw hun harsa karah chuan tiin Pu Dy. Speaker ka sawi duh a. He budget hi sawiselna tam tak leh a sawihnamna tam tak pawh a

awm thei karah hian ala duhawm viau lawm ni, a tha viau lawm ni kan ram tan, budget duhawm tak mipui chhungtinte thleng phak Budget a ni tih hi vawiinah he House zahawm takah hian ka sawi duh a, pass ngei tur pawhin ka rawn thlawp a ni e, ka lawm e.

**DEPUTY SPEAKER** : Awle, minute 1 ala awm a. Kan chawl tawh mai dawn em ni? House ngaihdan i la teh ang. A nih leh han inkohna hman a awm vak tawh lova, chawl ila, chawhnu dar 2:00-ah kan chhonzawm leh dawn nia.

**DEPUTY SPEAKER** : Chawhma lamah mi pasarihin kan sawi a. Tunge kan sawm leh ang? Thawhtanniah khan hun a chep viau thei a nia. Sawi duh kan awm lo em ni, thawhtanni atan kan khek vek em ni? Sawi duh kan awm siloh chuan House ngaihdan kan la anga kan chawl mai dawn em ni? Awle, member zahawm tak Dr. F. Lalnunmawia i lo sawm ang.

**DR. F. LALNUNMAWIA** : Pu Deputy Speaker, ka lawm e. Memberte ah thusawi a lang vak lo ani mai thei a. Ka thiam ang tawk tawkin hunawl remchangah hian kan sawi ve anga.

Pu Deputy Speaker, hei kum 2021-2022 atana budget speech ngaihnawm tak mai niminpiyah lamah kan ngaithla a. Kan House Leader leh kan Chief Minister zahawm takin hetiang anga budget ngaihnawm leh a lehlamah chuan hriatthiam har tak ni si kha simple zawka tianga a rawn present thei hi a lawmawmin a ropui ka ti a. Keini ang helama hriatna nei thuk vak lo tan phei chuanin a budget bu han thlir mai phei chuan hriatthiam harsa tak tak pawh a awmin ka hria a chung ang chu mi tam zawk leh mi nawlpui hriatthiam theih tura kan House Leader Zahawm tak leh kan Finance changtu ni bawkin a rawn khaikhawm thei hi a ropuiin a lawmawm ka ti takzet a ni.

Pu Dy. Speaker, kan hriat angin kum kalta lamah te Covid-19 hrileng pandemic avangin nasa takin kan tuar a, khawvel pumah economic slow down nasa takin a thleng a India ramte pawh nasa takin min nghawng a, chutianga a nghawng chu ala kal zel a ngai kan la awh pha lova chutiang karah chuan budget duhthusam a tha siam pawh a har hle ang tih ka ring a ni. Chuti chung pawhin kan Chief Minister zahawm tak kan Finance changtu pawh hian theitawp a chhuah a, hetiang ang budget puitling tha tak mai a rawn pharh thei hi ka lawm takzet a ni. Kan Chief Minister zahawm takin a rawn sawi ang khan he Covid pandemic karah hianin Mizoram abik takin mi nawlpuite mahni kutke a kan din theih a tul zia a rawn sawi te leh ei leh barah te mahni intodelh a tulzia a rawn tarlang te hi ropui ka ti a. Khangte khan hemi kawnga theitawp chhuah tur kan nihzia te, theitawpa tanlak a pawimawhzia te mipuite pawh min hriatchhuah tirtu nise, min tiharhtu nise tih hi ka duhthusam a ni.

Awle, Pu Dy. Speaker, kum kalta a kan sum hmuh kha kan budget speech-a a rawn tarlan ang khan vaibelchhe 1,185.3 in kan hmuh tur ang kha kan hmu zo lo ani a chu chu

zaa 29.86 in kan budget estimate aiin a tlem a ni. A tlemna kha a tam khawp mai a, nasa takin sorkar hmalakna te pawh anih tur angin a kal thei lova, chutiang karah chuan kan awm a, he hun harsa tak kan paltlang laia kan CM zahawm tak leh kan Finance enkawltu ina tun thlenga buai lutuk lova he state mipuite min hruai thei hi a fakawm ka ti a, a chungah lawmthu ka sawi duh bawk a ni. Tin, kumin kum kal laiah budget-a lang ang hianin nikumah khan revenue expenditure kha za a sawmriat pali point two zero ani a, tun kumtharah erawh chuan za a sawmriat pahnih point paruk pasarih ani thung a, kum kal liam ta aiin budget tharah hianin revenue expenditure hi a tlem a, a tlemna chu 1.53% ani a duhthusam erawhchu ani lo mai thei a. Amaherawhchu hemi revenue expenditure percent a hniam zawnga a kal hi thil lawmawm tak niin ka hria a ni. Tihianin, sorkarin hma a la zel anga hmasawna leh capital expenditure te a pung zawnga hmalak chhoh zel te pawh ka beisei a. Tun dinhmunah chuan he kan budget hi a tha tawk viauin ka hria.

Tin, sum leh pai dehchhuah lamah kan ram dinhmun ala harsa deuh rih chung pawhin kan budget speech-ah khan revenue surplus ₹579.42 crore lai mai neih tuma kan Chief Minister zahawm takin ngaihtuahna a seng hi a lawmawm hlein ka hria a ni. He kan Capital Expenditure hmang hianin hmasawna kawng hrang hrang kan thawh ka beisei a. A biktakin hriselna Health Care lamah te, Education leh Economics Development lamahte leh Social Development lamahte nasa takin hma kan la chho thei ang tih ka beisei a, mipuite thlir pawh a ni a.

Tin, Pu Speaker, kan sorkar flagship programme SEDP ah hian vaibelchhe 400 dah a ni a, a lawmawm hle in ka hria a. Kan House Leader leh Chief Minister zahawmtakin a sawifo tawh leh tun tum ah pawh a sawi angin he kan SEDP sum hi peipunga proposal hmanga sum dang kan budget piah lama tam zawk haichhuah nan hman a nih ka beisei a ni. He lai ah hian kan Chief Minister zahawmtak duhdan leh ruahman angin SEDP Board hrang hrangte pawn theih tawp chhuah a he vaibelchhe 400 hi thildang tam tak hmuh chhuah nan a kan hman a, SEDP hi nasa zawka economics development tamtak kalpui thei tura hma kan lak chhoh ka beisei a ni.

Pu Dy. Speaker, he kan budget a lo lang MNF Returnee te chhawmdawlina vaibelchhe 5 dah a ni hi lawmawm hle in ka hria a duhthusama tam chu a ni lo mai theia, amaherawhchu a bul tan nan chuan a lawmawm viau in ka hria a. Hei hian nakin zel ah pawh thil dang tamtak kha a hril chhoh ka beisei a ni. Tin kan GSDP growth rate hi 19.97% ni tura chhut a ni hi lawmawm hle in ka hria a. Hetiang a economic GSDP growth rate 19.97% a chhut hi a tak kan thleng ngat a nih pheih chuan thil lawmawm tak a nih ka ring. Tun ang hrileng avang a economic a slowdown hun harsa kan tawh chhoh kara ngai kan la awh theih lo lai a GSDP thanna hetiang ang zat an ni tur a chhut an ni hi ka lawm hle a, a tak kan thlen ngei pawh ka beisei a ni.

A tawp nan Pu Dy. Speaker, Disaster Risk Relief Fund ah crore 47 dah a ni hi lawmawm ka ti a. Hei hian Mizoram hmun hrang hranga khuarel chhiatna hriatlawk loh atan



a sum hman tur mamawh kan nei thei tur hi a lawmawmin ka hria. Pu Dy. Speaker, sorkarin a theih ang anga inrenchem a tum thu kan hmu a hei hi lawmawm ka ti a. Sawrkar sum theih ang tawka renchema tul feah loh chuan sawrkar hna lak rih lohte leh, sawrkarin loh theih loh a tih ang chi lo chu sum theih ang tawka renchem tura ruahmanna siam a ni hi lawmawmin ka hria a, hei hian nasatakin sawrkar sum leh pai dinhmun pawh a siamthat ka ring a. Hetiang budget min duan chhuahsak tu kan Chief Miniser zahawmtak, Finance department changtu nibawk chungah leh kan sawrkar official-te chungah pawh lawmthu ka sawi a, Pu Dy. Speaker, beiseina sangtak min siam a, mipuite pawh an lawm ang tih ka ring a ni. Ka lawm e.

**DEPUTY SPEAKER** : Sawi duh kan awm tawh lo tihna em ni, nge, Thawhtanni kan tin deuh em ni? Member zahawmtak Pu Lawmawma Tochwawng i lo sawm ang.

**PU LAWMAWMA TOCHHAWNG:** Pu Dy. Speaker, ka lawm e. Kan budget chungchangah a figure te, a chhiarkawpte luh chilhin a chhungthu han sawi vak ka tum lo a. A chheh vel leh a han lang thuak thuak te atangin leh tundinhmun leh nikum lampangte ngaihtuah chungin he budget hi sawi ka tum a. Ka intehkhin dan deuh takah chuan nikumah hripuiin min nuaia tun dinhmun hi kan thleng a. Cyclone thlipui na takin ram a han nuaia, thil a tichhe teuh a, sulhnu thenfai ngai a hnut chhiah teuh a, buaipui tur tamtak a hnutchhiah teuh niin ka inhria a, kan dinhmun tak hi. Nikum leh kumin hi chu chutiang dinhmun chu a ni a. Amaherawhchu kan Pathian zarah reh lam leh zalen lam te kan pan ta mek ni in a lang a, a lawmawm a.

Pu Dy. Speaker, tun tum kan budget session chu budget ngan telh tawlh, a puarpawheng leh a behbawm awmlo kan nei dawn niin a lang a. Kan neih ang angte fimtak leh ruahmanna uluk tak nena kan kalpui chuan ram mipui te tana chhenfakawm, thatpui tham kan nei dawn tho tho niin a lang a. Nikum lam ah pawh khan hmuh lawk loh leh beisei lawk hauh loin hripui Covid-19 khan min tlakbuakin min han nuai kha a ni a. Mahse khati chung khan ram mipuite hi ei leh bar ah emaw, nitin mamawh Oil leh Gas ah te pawh buhfai tlakchham kan nei chuang lo a. Chumi piahlahmah chuan central atangin engemaw zat hailuh a ni a, NERGRS ah te phei chuan ni 100 inhlawhna kum dangah pawh kan thawh ngai loh thingtlang khua amite phei chuan kan thawk kha a ni a. Engmah tlachham loin kan awm a, a thlawnin kan dawng a. Kan Chief Minister zahawmtak, kan House Leader ni bawh leh Minister-te kaihhruaina hnuaiah ram mipuite thlamuanging min awm tir a ni. Hmasawna ruhrel lah chu kal a thulh phah bawh si lova, khatiang hnuaiah khan kan awm a, hnathawh kha a kal zel tho a nih kha.

Tichuan, Pu Deputy Speaker, Budget, a sum leh pai tam leh tam loh aiin a awm ang ang thiam taka hman hi a tangkai zawk tiin ram hruaitu hlun tak pakhatin a sawi kha ka bengah hian a cham reng a, a dikin ka hria a. Sawrkar kal ta chiahah pawh khan khawvel hun tha economy-ah khawvelin, India-in a nei a. Economy-ah dinhmun that lai tak India-in

a nei a, sum leh pai chu India sawrkar atangin a lokal a, Mizoram-ah pawh a lo lut a, a tam kan ti a, engemaw zawng pheih chuan uan pawh kha kan uanpui lek lek em ni aw tih tur niin a lang a, a chhuan pawh kha an chhuang hlein a lang a ni.

NEDP-ah pawh khan a maka maka tam sum a awm tih kha a ni a, mahse, vawiin thleng hian eng hmasawna nge kan hmuh chuan le kan ramah hian tih turin kan awm a, chhawrbawka engnge ram mipuite hian kan neih chuan le, tih hi ngaihtuahnaah a awm a. Khang sumte kha an thei sem mai mai em maw ni le tih palh a awl khawp mai. Nimahsela, sum tam ringawt hian a hmanna lama kan fimkhur si loh chuan thatna lam aiin chhianatna lam pawh a kawh thei a ni lawm ni tih te pawh kha ngaihtuahnaah a lo lut a ni.

Mizoram, India ram leh khawvelin hun khirh leh thim a tawn mek laia, duhthusam tawh ni lo mahse hetiang sum hman tur ruahmanna kan han nei hi kan dinhmun chiang taka min tarlansaktu a ni a, a thudik duh thlak hlein ka hria. Duh se chuan pawisa hmuh tur beiseite hi hei aia thahnem zawh pawh hi kan budget buah hian a dah thei ang chu. Mahse, mahni leh mipuite bum duh lovin a nihna ang takin rawn pho lan a ni hi thil tha tak niin ka hria.

Pu Deputy Speaker, entirna kohhranah hian budget tam duh vangin, pawisa nei tam anga lan duh vangin, sum tam tak nei anga lan duh vangin buhfai thamah te hian hmuh beisei tam tham deuh dah sela, thalai leh pa ho pawh hian inhlawhna pawh an hmu em em ang tiin beiseina nen hun lokal tur budget an siamah hian kum hmasa aia let hnih let thuma tam budget dah ta sela, a tak ram a lo thlen leh siloh khan kohhran member-te tan a beidawn thlak duh viau ang. Chu ai chuan a tak tak ram dai tura inbuisaiha inpuahchah kha a tha zawkin ka ring a.

Kan budget-a SEDP sum tur pawh hi a bua awm tur thahnem fe chu dah hi a harsa hauh lovang a thu chuan. Mahse, kan Finance te leh kan Minister te hian mahni inbum duh lovin a tak ram min daipui phawt an tum niin a lang a, duh nise mumang budget pawh hi min pharh khumin an rawn chhawp chhuak thei ang. Amaherawh chu chutiang ni lovin, thil tak tak ni turin he kan hmachhawn hi dai turin mipuiaah thudik tak an rawn tarlang niin ka hria a. Budget hi fel tak, fim tak, ruahmanna fel taka hman chuan ram mipuite tan thlamuanpuiaawm a ni.

Pu Deputy Speaker, keini tawn ang bawh hi khawvel indopui pahnihna tawp lamah khan Germany te, Japan te leh Juda ho pawh khan an lo tawh tawh a nih kha; kan tawrh aia a let engemaw zata rit, tahna leh ha thialna an tawh tawh a nih kha. Mahse, an phurrit leh tawrhna chu inhneh tir duh lovin chona a ngaiin an bei let a, tuna an dinhmun chu khawvelah hian kan hriat hi, khawvelin kan entawn a, anmahni atangin kan mamawhte kan pur leh ta a nih hi. Keini pawh hi, kan hun tawng harsatna hi dinchhuah nan hman tum zawh ta ila a tha awm mang e aw, a hlawk zawh awm mang e aw kati a ni. Chuti lova Sam Ballack-a te, Toby-a te ang deuha mipui tithlabar zawng te, a tithlaphang zawng tea tawngka kan cheh fo

chuan kan hmalam a thim em mai, a huphurhawm, mipui chan tur a awm lo, ei tur a awm lo, thawh tur chu a awm si, ti zawnga kan sawi kan sawi chuan, chutiang tawngkam kan cheh fo mai chuan hruaitu mawhphurhna kan kova awm hi a letlingin kan hmang tihna a ni dawn lawm ni. Tun ang hun hi a ni lawm ni hun harsa leh hun khirh kan tawh hi, kan ram mipuite hmaa ding a, zam hauh lo tura kan fuih hun tur chu le. Ram mipuite, helai Zoram rorelna sang bera thute hian kan thusawi lehzel turah pawh hian ram mipuite tithlabar lo zawngin, a thlamuan zawngin kan beih tlan chuan, kan thawh tlan chuan, kan neih ang ang nena kan thawh chuan kan ding khawchhuak ang, kan dam khawchhuak ang, hun tha zawk a vur kum hian min hmuak a ni tih te pawh hi kan sawi ni sela a duhawm ngawt ang.

Patling cheng sangkhat nei ve ve hi a hman dan hi a intangkai hleih theih lutuk a. Chuvangin budget-a pawisa tam leh tlem, hman dan pawh hi a intangkai hleih theih dawn viauin ka hria a ni.

Tin, Pu Speaker, ram hmasawna tur kan sawiah hian sawrkar inrelbawlina tur leh sawrkar hnathawkteah hian kan dah tam lutuk kan ti chawk thin a. Kei ka ngaihtuahnaah chuan a dik em ka hre lova. Sawrkar hnathawkte hi ram mipuite an ni tho, kawla nichhuak chhiara nitina thawkte an ni a, chuvang chuan, an chanvo, an chanai tlema a lo vawng deuh a nih pawhin hun lokal lehzelah hi chuan ram mipuite nena rualkhai taka sawrkar sum kan chan tlan del del hun te hi a la awm ang a. Nichinah kan Member zahawmtakin a sawi tak ang khan, kan zavaia rualkhai taka he ram tana kan thawh hun, mipui tana sawrkar pawisa lokal hi kan hman tlan theih ka ring a. Chubakah chuan Pu Speaker, kan House Leader zahawm takin kan budget hi chu a chi tur mai a ni e a tih kha a taka lo lanna chu, hei, hun harsa leh hun khirh tak hun thim hnuaiyah pawh hmanni lawkah kan pass kha, sports-ah te pawh, ‘pawisa nikum lawkah a tlem a ni lawm ni, dil belh rawh u’ tia min nawr min nawr lai khan tunah chuan, ‘a tam lutuk, in hmang diklo’ tih kha kan hlawh leh ta zawk a ni. Pu Deputy Speaker, minute khat lek khawngaitakin. Kan thlawh fai thiama hma kan lak thiam phawt chuan heng hmang hian let sawm thum te, a let sawm nga te, a let za te pawh kan thar chhuak thei ngei ang tih ka beisei tlat a ni.

Pu Speaker, tun budget-a kan han pharh thei hi hun harsa tak karah pawh, khawvelin nikumah hna an thawk thei lo a, India-in hna a thawk thei lo a. Hnathawk thei lo kut zeng hnungkhirha kan awm chung pawha budget heti zat kan houtu-ten an han pharha mipui chan tur engemaw zat chhiah thar lakna tur pawh ni chuang lova, phurrit pawh awm chuang si lova mipuite nena thawh ho na tur buatsaih a ni hi, he budget hi ram mipui tana siam a ni chiangin ka hria a. Chuvangin he budget hi chu duhthusam a ni lo ve kan ti a ni pawhin budget tha tak chu a ni tho tho lawm ka ti a ni. Ka lawm e.

**DEPUTY SPEAKER** : Tunge han sawi leh ang le? Member zahawm tak Pu VL Zaithanzama i lo sawm ang.

**PU VL. ZAITHANZAMA :** Pu Deputy Speaker, ka lawm e. Vawiinah kum 2021-2022 chhunga kan sum mamawh budget kan sawiho dawn a ni a, ka hmaa mite sawi kha ka lo ngaihthlak chinah kum kan hman mek 2020-2021-ah hian khawvel pum puiin hrileng avangin harsatna kan tawk a. Mizoram pawhin nasa takin kan tawk a ni. India, kan awmna ngei pawh kan dinhmun a tha lo a. Chumi avang chuan central atanga kan sum hmuh beisei vaibelchhe 1185 zet kan hmuh phak loh thu te kan lo ngaithla a. Chumi chuan kumina kan budget sawi tur pawh hi engemaw chen a rawn nghawng lo thei lo tih kan hria a ni. Tun kum kal mekah khan kan sum dinhmun chhiat avangin ways and means advance pawh vawi sawm thum chuang kan puk laiin, kan sawrkar hnathawk tam tak pawhin a hun takah hlawn an la thei lo a, chutiang harsatna karah chuan kum thar 2021-2022 budget kan han buaipui chho a. Hei hian thui tak a nghawng ang tih chu kan ngaithla tawh a, keipawhin ka pha lo ni.

Amaherawhchu, khatieng harsatna hripui avanga kan tawh lai khan Mizoram GSDP kha kuminah khan kan budget estimate ai khan a rawn sang ta tlat mai a. Kan budget estimate-ah khan 17.88 a nih laiin khatianga hripuiin min tuam mek lai khan 19.44-ah a kai chho dawrh mai a. Ka'n thlir mai khan hei hi tih sual palh nge tih sual luih aw ka ti a, a enga pawh ni se kan tisual palh a nih chuan a pawi viau ang a, kan tisual lui a nih chuan a pawi leh zual turah ka'n ngai a. A dik leh dik loh erawh chu ka chhut ve thiam tawh lova.

Pu Deputy Speaker, tam tak sawi ka tum lo a, allocation of priority sector tih kan Chief Minister zahawm tak Finance changtu-in a sawiah khan han luh ka tum deuh a. Hei hi Mizo tawngin ka han dah a, thil ngaih pawimawh hmasakte ka'n ti ve ringawt a. Thil ngaih pawimawh hmasak panga tunah hian kan hmu a. Pakhatna-ah hian SEDP kan hmu a, kan sawrkar flagship programme a ni bawka pakhatnaa rawn dah awm takah pawh hian ka ngai a ni. Vaibelchhe 400 hna hrang hrang thawh nan dah a ni tih kan hmu a.

SEDP kan hmehriat tanna hi tun MLA inthlan hnunung ber hma kha a ni a, khatih laia kan lo hriat dan kha chuan nuai 3 sem kha kan rilruah hian a lang lian a ni. Vawiin thleng hian SEDP kan tih hi chuan a hnungah hian nuai 3 kha kan hmu tel nghal a ni. Khatih lai khan vaibelchhe 1,500 budget-ah kan dah ang, nuai 3 kan dawng vek ang tih kha kan lo ngaihthlak thin dan a ni a. Vaibelchhe 1,500 chu chhungkaw 50,000 daih a ni.

Mahse, kum 2019-2020-ah budget kan han pharh a, vaibelchhe 750 kan dah ta a. Chu chu chhungkaw 25,000 hnenah nuai 3-in a sem theih a ni. Amaherawhchu kan sem ta lo niin ka hria. Kum 2020-2021 budget-ah vaibelchhe 513 kan hmu leh a chhungkaw 17,100 hnenah nuai 3 sem turin a daih a ni.

Vawiiina kan sawi lai mek kum 2021-2022 kan budget-ah hian vaibelchhe 400 a lo lang ta a. Chu chu chhungkaw 13333 daih a ni. Ka han sawi kual kawih chhan chu Pu Deputy Speaker, keini lo hriat ve danah chuan SEDP hi a zuih ta telh telh mai a. Kan rilruah nuai 3 sem lo lang kha a langsar ta lo tawlh tawlh a ni. Heti hian a nawi telh telh a, nakumah kum

lehah a nawi ral mai ang tih ka hlau deuh a, chu chu ka hmuh dan a ni a, chu chu ka sawi lang a ni; thil ngaih pawimawh hmasak-te zinga a hmasa ber a ni.

Kan thil ngaih pawimawh hmasak te zinga a pahnih na hian MNF Returnee te thuan nan cheng vaibelchhe 5 dah hran a ni baw e tih kan hmu a, a lawmawm hle mai a. Hei hi Governor's speech ah pawh khan ka sawi tawh a, MNF returnee a rawn ti a. Governor's speech ah kha chuan returnee a rawn ti tawp mai a, eng returnee ber nge HPC Returnee te pawh an tel em te ka ti deuh a. Vawiinah chuan chiang leng lawng takin a rawn ziak lang a.

Remna avanga rawn haw te kha an vaiin mi 581 an niin ka hria a. Amaherawhchu, waviin a kan hmuh ah hian returnee a tih avangin khami lo pawh kha returnee hrim hrim kha chu a huam turah ngai ila. Chung ho tuam hlawm na tur cheng vaibelchhe 5 zet mai kan hmu hi a lawmawm ka ti a, ngaih pawimawh chhoh reng atan pawh a tha hle in ka hria a ni.

A pathumna erawh kha chu a lawmawm tho na in ngaih pawimawh hmasaa han dah em atan chuan a tul lo mang e ka ti deuh a. MLA Local Area Development Fund atan cheng vaiblechhe 60 ruahman leh a ni e tih a ni a. Hei hi kan hmang tangkai em em mai a keini i veilama thu te tan phehi hi chuan a tangkai leh zual a. Kan inngahna tak meuh meuh a ni. Hemi atan vaibelchhe 60 a han dah leh hi a lawmawm viau rualin thil ngaih pawimawh hmasak te zingah kha chuan kalphung pangngai ah ka dah deuh a, han ngaih pawimawh viau tur atan kha chuan a tul ber viau em aw ka ti deuh a.

A palinaah chuan, Co-operative Society te chungchang a lo lang a. Subsidy awma loan lak tihpun zel nan cheng vaibelchhe 10 ruahman a ni tih kan hmu a. Co-operative Society te ngaih pawimawhna hrim hrim lo lang hi Pu Deputy Speaker, a lawmawm hle in ka hria a. Amaherawhchu, helaiah ngai pawimawh ang takin priority sector ah a palina lai ah kan dah rual hian Co-operation Department hi kan ngaihthah hle si hian ka hria a. He House-ah hian ka din chuan ka sawi ve ziah a, an budget pawh hi he House-a ka thut ve atang pawh hian a la minus char char a, Department Budget minus char char awmchhun niin ka hre nghe nghe a. Chuvangin helaia kan dah ang ngei hian ngaih pawimawh tha ka ti a. Vegetable Supply Chain-ah te pawh hrilen lai pawhin kan hmang a, Co-operative Society leh State Level Society te an tangkai tehlul nen. Anni hi kan ngaih pawimawh rau rau chuan ngaih pawimawh tlang ila tiin ka han rawt a ni.

A tawp berah atan, pakhat chauh ka nei tawh e, Pu Deputy Speaker. Urban Local Body leh Rural Local Body leh kan Autonomous District Council pathum te tan kum kal lai mek zulzuia dah rih leh phawt tih chungchang kha kan hmu a. Hei hi cheng vaibelchhe 103 hmuh beisei a ni a. Heta tang hian cheng vaibelchhe 69 Rural Body Grant tan dah a ni a, Urban Local Body lamin cheng vaibelchhe 34... Pu Deputy Speaker, ka zo tep e, minute chanve lek... hei hi 2<sup>nd</sup> Mizoram State Finance Commission ruahman anga sum la pek tur a ni dawn a tih a ni a. Hei hi ngaih pawimawh hmasak zinga tel ni lovin ngaih pawimawh loh vanga lohtheih loh thil a va ang ve ka ti deuh a. Hemi ULB leh RLB leh Autonomous District

Council pathum te tana Grant-in-Aid hi 2<sup>nd</sup> Mizoram State Finance Commission ruahman anga pek tur a ni a. Mizoram State Finance Commission kha an term a tawp tawh a, a 2<sup>nd</sup> hi kan siam lawk lo a, churang chuan harsatna kan tawk a , central lam atang pawha warning kan hmuh hnua tih hram niin ka hria a. Churang chuan ngaih pawimawh hmasak zingah ni loin ngaih pawimawh loh avanga loh theih loha kan tih tur lo lang zinga telah ka'n puh deuh a ni. Pu Dy. Speaker, hun tha tak min pe a ka lawm e.

**DEPUTY SPEAKER** : A lawmawm e. Tunge ka han sawm leh ang le?

**PU R. LALZIRLIANA, MINISTER:** Pu Dy. Speaker, min sawm ve mai rawh.

**DEPUTY SPEAKER** : Aw, Minister zahawm tak Pu R. Lalzirliana i lo sawm ang.

**PU R. LALZIRLIANA, MINISTER:** Ahmasain inkaihhraina hnuaiah vaccine-te kan han la a, ka khua hi a sik maithei a, haw hma te pawh ka duh deuh a ka dil nghal che ni se.

An sawi duh lo hlawm em mai a, kan budget hi tha an ti a, 'sawi lo pawhin i pass mai ang u wawiinah hian, naktuk chu kan chawl mai ang a' an ti niin ka hria, MLA zahawm takte hian. Anih loh pawhin 'naktuk chawl loin wawiin chu i chawl mai ang ti' anrawn ti deuh ni te pawh hian ka hria a. Mahse, sawi tur i la zawng hram hram a, a lawmawm khawp mai a.

Engpawh nise tawitein an sawi duh loh zarah han sawi ve hrim hrim ka duh a, ka chhuah hmain. Pu Dy. Speaker, kan House Leader kaihhraina hi a zalen ka ti a, nuam ka ti a. Helama kan lo phei ve ta te pawh hi tunhma ka ngaihtuahin a zalenthlak hi ka ti a, a nuam hi ka ti khawp mai a. MNF party huangchhung leh helaia kan House-a an han inngam dante ka ngaihtuah hian hetiang ang hi thian tha awmkhawm leh ram kan hraina tur atana mahni ngaih dan sawi pawng pawng ngam vek mai kan han awm khawmte, kan Chief Minister-in committee dang kan han neih pawha lak khawm dan thiam tak mai a ro arawn rel thin te hi a fakawm ka ti khawp mai a. Chu chu thuhmaah ka sawi duh a.

He kan budget hi a tha thawkhat a ni ang tih an rin thu nichinah kan hotute pawhin an sawi a. Sawi tur tamah hi chuan kan ding tuk tuk mai a, sawi kan inchuh thin a ni a, amaherawhchu, tunah hi chuan han sawiselna em em tur awm hian kan hmu lo tlang niin ka hria a. Tin, heti khawpa sum harsatna kan tawn lai pawha mipuia vawm bei tum miah loa kan Finance Minister Chief Minister zahawm takin mipuite phurritna tur hranpa siam loa tax lakna tur thar arawn duang lo hi a mak ka ti khawp mai a, a ropui ka ti a. Heta tang hian mipuite tan he sawrkar hi a ding nghet hle a ni tih hi a hmuh theihin ka hria.

Tin, mithiamte thil chik mite pawhin ngaihtuah se, helaiah hi chuan tax thar lak awm a ni tih an nei thluahin ka ring. Amaherawhchu, khawvelin harsatna a tawk a, keini pawh chutah chuan kan tel ve a, chutiang a nih laia mipuite phurrit zawnga ti lo hram hram a kan Finance Minister zahawm takin ruahmanna a rawn siam hi thil ropui tak, fak tlak niin ka hria. Vawiin-ah hian fak tlak hi chu fak mai ila, sawisel ngai an awm a nih pawhin ram a thatna tur chuan insawisel hreh lem lo ila a pawl loin kan ring deuh a ni.

Tichuan, central atanga kan dawn tur cheng vaibelchhe 1,100 chuang daih mai a ni a. Chuti chung pawhin riltama mangang Mizoram-ah hian kan awm lo te hi a ropui tak zet a. Tin, harsatna eng eng emaw kan tawk chho ve zel a, Covid chungchangah damdawi-ah harsatna kan nei ngei dawn a ni tih te miin an ringin an sawi thin a. Cabinet meeting kan han nei a, kan Finance Minister-in pawisa awm dan chu a hre vek mai a. Chutiang harsatna lian tak rilrua a pai reng lai pawhin mipui ten harsatna an tawn ai chuan a awm ang ang hi khawia mi pawh hi kan hmang mai ang, inthlahrung reng reng lovin rawn ti rawh u tia Covid-19 concern Deptt. te tawngkam a hmuh mai piah lamah harsa lovin a hnena an rawn sawi hi chu a ti zel niin ka hria a. Health Department pawh a chak kan tihna chhan pawh kan Chief Minister hi hetiang ni lo se chuan chak fal ngaihna a awm lo hrim hrimin ka hria a, Pu Dy. Speaker. Heng atanga ama nau te, thawhpuite a care zia bakah mipuite a ngaihsakna a lo lanna a ni tih hi kan hriatpui a tha hle in ka hria a ni. (*Pu Lawmawma Tochwawng-in Chair a la.*)

Pu Chairman, sawrkar hi ka lo hrawn ve nual tawh a, tun sawrkar pawh hi sawrkar an siam hmasakah khan helamah ka awm lova, ka hrawn tuanchhuak ve zak tawh a. Tin, a hnua kum 10 sawrkarna siam zingah pawh khan ka tel ve tawh a ni.

Sawrkar kal tawh ka hrawn ve tawh zingah leh a hmaah pawh nih ve kan lo tum tawh avangin eng nge an kalphung tih te ka lo zir ru ve thin a, mahni phak tawk ang angah chuan; chungang-ah chuan kan ramri hi sawrkar lai nilo opposition zawng zawng hian kan vei em em a ni. Amaherawhchu, sawrkarna han chelh hian kan vei em em anga thil tih a har khawp mai a, a taka hma latu hi an tam lova. Tin, kan eng pekna te, kan tui pekna te, tunhna atanga an lo neih tawh ang han zauh emaw, han tihsei emaw hi ka la hmu lo va. Chuvangin, he sawrkar, tuna Pu Zoramthanga kaihhruai sawrkar erawh hi chu a dangin ka hria. Hengte hi Budget Session-ah hian kan sawi ngei ngei a, pawimawh khawp mai a, han sawi chhuah hram ka duh a. Chutiang chuan Chief Minister zahawm tak huaisenna leh amah chu inthukru tlat siin midangte a hman thiamna hi thil ropui tak a ni.

Hotu huaisen hnuaiah lo chuan tumah hi a huaisen theihloh. A chhan chu midang tu emaw lo zu huaisen fal se la a tawpah sum a lo ngai a, tin, sum piah lamah tha a lo ngai a. Chutiang piah lamah chuan a tul phei chuan in kahna hial pawh thleng thei a ni. Chung zawng zawng hmu tlang vekin a naute min tiphur thiam hi thil ropui tak a niin ka hria a. Chungah chuan heng Thinghlun te, an ram, an khua bak khu eng a awm lo reng reng a, an khua atanga 7 or 8 kms bawr vel khu Assam in a rawn tibuai a, an kuhva te, an thingfanghma

te leh an thlam te an rawn hal a, an rawn sat chhia a. Chungangah chuan, kan Home Minister zahawm takin sipai a zuk dah rap mai a, chungah te chuan eng an neilo tih kan hria a, kan MLA te an zuk kal a, a tul angin temporary-in kan han pawh tir a, mahse temporary ni mai lovin eng hi a takin an nei tur a ni, kan ti a. Sum harsat zia chu kan sawi tawh a, sawi nawn a ngai lova, chung angah chuan engzat nge sum hman tur pawh kan Chief Minister, Finance Minister hian, ‘han estimate phawt ula kan ngaihtuah dawn nia,’ tih lam ni lovin, ‘zuk kal ula tih tur a ni mai’ a ti a. Tichuan kan zu kal a, helaiah hi chuan ban chuti zat a ngai ang a, chutah chuan kan ti anga in lo phun ang a kan ti a, chawp leh chilhin sum pawh ala awm hma hmain, a rultu turin ka rul thei dawn tih min tiam avangin huaisen takin kan zu ti a, tunah chuan a eng vek tawh a ni. Khanga tui vawt hmuh tur an hmuh loh pawh kha cooler te nen an inchhawp vek tawh a ni.

Tin, a kalkawng te pawh PWD-in khulaia an neih ang ang te kawrah hume pipe te an phum nghal a an kal thei a ni. Chu mai a ni lova, chu aia thui zawk khutah Medili-ah, an duty-na Medilu Lui, forest ho duty-na eng an la neih reng reng loh, thlang lamah Assam ho ta an lo zuk pawh ve tawk tawk, tun buaiah khan an hlih sak vek a, hengte pawh hi a eng tur a ni kan sawrkar chuan a ti mai a. Chungah chuan a kalna tur kha ramhnuai vek a nih avangin a hrui tha chi ngat Aizawl-ah pawh kan duh em em ABC line kan zuk thlung thla leh vek mai a, a eng vek tawh bawk a ni. Chu mai pawh chu ala nilo, sum harsat naka laiin Vairengte-ah a hmaa kan chhitna atang khuan (a ban chiah kha ka chhiar ta lo va), kan zu kal khan, heng kan thalaite leh khawtlangin in lo pui ang a zan khatah in phun duak ang a, tumahin an rawn sawi chhe hman lovang. Kan Police te veng tur an awm a, kan ti a, chutiang te chu mi huaisen tan lo chuan tun hma a kan neih siloh kha tih ngaihna a awm lo reng reng; chung te chu tih enin a awm vek tawh a ni.

Chumai chu ala nilo leh nghal a, hmanni lawkah khulaiah Pu Rintea bial Zophai, Bairabi bulah harsatna lian tak kan han tawk leh a, chungah chuan helai a bialtu pawh hi a bial tu niawm tak vawiiin-ah hian Pathianin min pe niin ka hria a, a huaisen a, ama hovin ruah hmanna fel tak kan lo nei a, leiletah tunah chuan motorin kan kal tlang thei reng tawh a ni, tuna Assam police ho rawn inkulhna thleng khuan. Chu chu kan Chief Minister zahawm tak kaihruainain, amah ngeiin zuk kal la, kan ti eng ang tiin zuk tiam rawh a ti a, ka zu ti ve leh tawp mai a ni. Huaisen nih kha amah zarah ka zu hlawh leh ta vel mai mai a ni. Keimah ka nilo, a tirtu kha, a tirtu chung chu a pik e, tih kha chu a nilo ang chu maw, a tirtu kha Chief Minister, Finance Minister a ni. Tunah estimate kan siam a, kan vawm lut a, min pe leh mai dawn a ni.

Chutiang chuan kan rama kan leilet te hi kan develop thata, midang kan chhawr zel pawh ngai lovin keimahni leh keimahni hi kan in labour, kan inchhawr thei dawn a, chutiang zawng zawng chu kan Chief Minister, kan Finance Minister leh kan hotu bialtute hian an duh avangin tunah hian tihin a awm leh mai dawn a ni.



Chungte chu helaiah in sawi tha duh si lova, han sawi lan ve loh chi niin ka hre lova, hun tha tak mai, Pu Chairman, min pek avangin lawmthu ka sawi a. Hengah hian lawm lo chi ziazang an ni lo kan mipuite hi. A tak tak an hriat chuan an lawm chho zel ang tih ka beisei a ni. Ka lawm e.

**CHAIRMAN** : Tunge sawi leh ang le? A thu tur tak ka thu em pawh ka hre lo a, keia lo tih tawp theih a ni em, nilo em pawh ka hre chuang si lova, kan din bawh si loh chuan tihtawp mai a ngai dawn tihna a ni si a, kan House Leader te, kan senior te, a tihtawp ngawt theih loh maw? Tih tawp thei maw? Member ten kan duh a nih chuan kan ti tawp mai dawn a mi? Ka han thut chhungah pakhat sawi chanve chauh kan ti a, sawi tur kan awm tawh si loh chuan, ka thawhuai mai. (*Speaker in Chair a la.*)

**SPEAKER** : Mi sawmpathum-in an sawi tawh a, sawi leh tur kan la awm em? kha, Chairman in a sawm che u a nia. Kan inkhek deuh em ni? Ni hnih tih tur a ni a. Tin, tunhma pawhin tihdan thin a ni ve tho a, dar hniha ban te, dar thuma ban te, dar lia ban te pawh hi a awm ve tho a nia.

A nih leh kan chawl rih mai dawn em ni? Aw le, tunah chuan kan chawl rih ang a, kar leh Thawhtan Ni 8 March, 2021 chawhma dar 10:30-ah kan thukhawm leh dawn nia.

*Sitting is adjourned. (2:54 PM)*